

60

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9



C40-4514

重刻寶王三昧念佛直指序

念佛三昧所以名爲寶王者。如摩尼珠。普雨一切諸
三昧寶。如轉輪王。普統一切諸三昧王。蓋是至圓至
頓之法門也。始自華嚴終至法華。一代時教無不詳
揚此寶王三昧。始自文殊普賢乃至永明楚石。一切
菩薩聖祖無不修證。弘通此寶王三昧。而世之昧者。
猶以爲自性彌陀非卽樂邦教王。惟心淨土不在十
萬億西。妄認六塵緣影爲自心相。全不知十方法界
一一無非卽心自性也。可不哀哉。元末明初鄧江有

大善知識厥名妙叶。淡憫邪見。述爲念佛直指二十
二篇。世久失傳。故雲棲老人每欲見之而不可得。神
廟年間。古吳萬融禪伯偶于亂書中得此遺帙。與唐
飛錫法師所撰寶王論同爲一編。皆雲棲老人所未
見也。韓朝集居士先刻寶王論板。置于雲棲。予續刻
此直指板。留于佛日。客歲幻寓長干。有車霑蕃居士
秉受歸戒。聽講唯識心要及南岳大乘止觀。遂專心
修淨土行。今夏禁足九旬。執持名號。因念今時狂妄
之徒薄視佛法。以大悲心手輯古今淨土法語。

一冊名曰念佛須知。分爲信解發願修行證驗四門。
蓋信願行三乃生西之要筏。而證驗則舉果以勸因
也。節錄甫成。適予應祖堂請。重到長干。遂虛心乞予
讐較可否。予曰。居士之志則善矣。但淨土法語從古
迄今。充楹積棟。曷擇其簡切精到者而流通之。不尤
易取信乎。以予觀居士命名立科之旨。則叶師直指
最爲相似。何以言之。彼第一極樂依正。第二斥妄顯
真。第三訛解乃至第八示折攝。皆居士所謂信解
門也。第九勸修。卽居士所謂發願門也。第十勸戒殺

1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

乃至第十八羅顯衆義皆居士所謂修行門也。第十九一願四義謂戒解行向是重申以願攝信行也。戒亦是行解即是信向仍是願一願便具四義四義乃滿一願明信願行本非條別願居於中而統前後厥義彰矣。第二十示滅罪義。第二十一示列祖行皆居士所謂證驗門也。第二十二正示廻向普勸往生例同經論有流通分從始至終雅合居士之旨若此居士何不捨己從人樂取於人以為善乎。於是居士躍躍歡喜再拜稽首而謝曰某乃知妙叶大師先得我

心之所同然又能發我之所未發也今得奉此遺編誓當刊布流通用薦先人早生淨土又願普與法界有情決定信入此門永不退轉請更序厥緣以爲同志者告噫如車居士亦可謂勇於自利利他者矣讀是書者慎勿負此苦心也哉

庚寅冬十有一月之吉古吳萬益道人智旭識於祖堂幽栖寺之大悲壇右

寶王三昧念佛直指總目

卷上

極樂依正第一

斥妄顯真第二

訶謬解第三

正明心佛觀慧第四

道場尊像念佛正觀第五

闡斷空邪說第六

開示禪佛不二法門第七

示諸佛二土折攝法門第八

勸修第九

卷下

勸戒殺第十

勸持衆戒第十一

勉起精進力第十二

正行第十三

別明客途所修三昧第十四

三昧儀式第十五

揚佛下化之力第十六

十大礙行第十七

羅顯衆義第十八

獨示一願四義之門第十九

示念佛滅罪義門第二十

略示列祖行門第二十一

正示廻向普勸往生第二十二

附真妄心勝劣圖說

附破妄念佛說

寶王三昧念佛直指卷上

并序

四明鄞江沙門妙叶集

念佛三昧稱爲寶王者。蓋於一切三昧之中。最上三昧者也。首獨唱於廬山。後徧流於天下。歷代所修。往生非一。著文於世。證驗良多。自昔至今。富於編簡。若禪若教。無不尊崇。是聖是凡。悉皆景仰。但末代淺根。因藥致病。以極樂淨土。不求之於西方。而求之於分別緣影。多流此見。內懷痛傷。嗟彼唐喪其功。雖修無感。乃以淨土諸經。及各宗疏鈔。採

其奧旨述以成編。雖其言之不文。莫敢裁於胸臆。自爲警省。敢聞於人。故以寶王三昧念佛直指定其名焉。

極樂依正第一

原夫無上正徧知覺聖主世尊。普應機宜從兜率宮降神於世。故四十年中說法三百餘會。皆令羣有同證真常。乃至末後靈山會上方說法華。俾令衆生開示悟入佛之知見。出世本懷於茲暢矣。然出世度生之道。非但釋迦三世如來。莫不咸爾。而於釋迦一代。

施化法門之中。求其所以機宜相感。生佛緣淡。至簡至易。而功高徑捷者。無越求生淨土一法門也。蓋念佛法門。首因法藏比丘於無量劫前。爲大國王。聞世自在王佛說法。遂棄國出家而成比丘。其佛復爲廣說二百一十億佛刹莊嚴。人天善惡麤妙不同等事。法藏聞已。卽於佛前發四十八種大願。願成佛時。國中無有三途三毒八苦八難九惱十纏等一切障礙。生我國者。皆住正定。得忍悟心。解脫勝智之人。乃至十念得生。若不爾者。不取正覺。其時大地震動。天雨

妙花。空樂自鳴。佛與其記。今已得果成佛十劫。因昔願勝功德。神通光明力無畏等。超過十方。佛號阿彌陀。其阿彌陀佛所居之國。從是娑婆世界直西過十萬億國土。名曰極樂。或曰安樂。今見在彼。以昔大願及神通力而爲說法。攝取十方世界念佛衆生。衆生者。得不退轉。刹那尚莫勝數。何況歷劫度脫。其生彼者。有何限極。微塵恒沙所不能喻。其佛國土莊嚴勝妙。超過十方。有諸寶池。隨其大小。皆七寶成。或有大池。其量盈廣。正住其中。底布金沙。邊鋪階道。其池

之上。復有樓閣。千層萬疊。廣博妙好。光明赫奕。不可思議。其池之內。八功德水。香美清徹。盈溢充滿。爲十四支。於諸無量莊嚴具中。尋流上下。出聲演說無量法門。是妙水中。復有六十億七寶蓮華。圓正等水。注葉間。四色四光。三輩九品。行列次第。香潔微妙。映蔽其國。寶地平正。願力所成。於其地上。復有七重欄楯。七重行樹。寶幢臺榭。旛蓋珠纓。各各無量殊特妙好。周廻間列。莊嚴其國。又於虛空。雨諸天衣。天香天花。天繒天樂。各各無量。續紛散漫徧虛空界。如是無

量諸莊嚴具。皆金銀瑠璃碑礎瑪瑙毘盧迦。迦葉叔迦等。金剛摩尼如意珠王不可思議衆寶所成。是衆寶內各放無量百千萬億寶色光王。互相輝映。一一徧照三千大千世界。其光交羅不相障礙。極虛空際不可窮盡。如是無量。一一光明。一一莊嚴與虛空中天樂香花珍禽鈴網。其聲雅正。宮商清徹。鏗鏘應節。流出來無量無邊微妙之音。其音徧滿不間不斷。悉能演說苦空無我諸波羅蜜。歎菩提道讚佛法僧。或說念處。正勤根力覺道。諸菩薩行。諦緣願度。力無畏等。十

八不共大慈大悲大喜大捨不可思議無量法門。其所說法三世十方依正色心融通無礙及勸精進。如佛音聲等無有異。其國衆生聞是法已悉皆念念隨其所樂速能證入三乘勝行。一切道品無量解脫。如從佛聞得無差別。縱是凡夫聞此法故自然精進。尚無一念疲倦之心。云何更有退轉。又彼國土純一男子。無有女人。蓮華化生不處胎胞。妙服美味能成法喜。從其所欲悉隨念至。無寒暑晝夜無生老病死。無土石諸山。無三途惡道。往來虛空經行樹下。欲作佛

事。示現神通悉從心念。又復壽命無極。如是種種快樂無極。故名極樂。况復彌陀世尊功德光明威神相好各八萬四千。如紫金山處大蓮華師子之座。莊嚴赫奕。超過虛空。大海彌盧所不能及。眉間白毫功德增勝。如日舒光。衆明悉絕。光中化佛菩薩聲聞各放光明。遠照塵刹。攝受衆生。彼二大士亦復如是。文殊師利普賢大行。諸大菩薩皆住彼國。一生補處其數甚多。諸上善人俱會一處。悉爲良友。以佛爲師。親近慈容。聞第一義。頓超三界。卽證無生。十地高超二覺。

圓滿。況能於念念中供養十方三寶。成就一切法門。遊戲神通淨佛國土。乃至入於三途六道。舒光破暗。救苦衆生。或復塵刹分身。隨機化導。應病與藥。如佛弘慈。於念念中。圓滿普賢所有行願。具文殊智。有大勢力。如觀世音。同證菩提。同佛所住。則一切衆生性雖昏昧。得聞此說。誰不歡喜而生信樂。然彼妙土。及莊嚴事。雖具我心。若非彌陀如來於過去世爲度衆生。行菩薩道不可稱計焉。得成就當知彼佛行願無邊。莊嚴無盡。是故如來居彼國土。大願圓滿寶土斯。

成依正莊嚴悉皆具足。如是莊嚴依正境界。假使各方面百恒河沙微塵刹數菩薩聲聞以大辯才如實稱揚。盡未來時不可窮極。若善男子善女人聞如是說。至心信樂欲生彼國者。應如佛教圓發三心。其足衆戒。不犯威儀。然後直心正向。觀彼國土一切依正無量莊嚴勝妙境界。及彼如來八萬相好功德光明。清淨之身。或復隨取一相一境乃至如來眉間白毫相光。遠離虛妄。或一念至十念。或一日至七日。譬如壯士屈伸臂頃。卽得往生。其有直信有彼國土。有

彼如來願力威神。不生疑惑。但能一心不亂。執持名號者。不出所期。亦得生彼。何待色身報滿。然後得生。當知阿彌陀佛接引衆生。令離苦海過彼慈親。於先劫中已立大誓。無苦不忍無行不臻。無願不立。無法不說。爲度我故。方便百千。今正是時。目睛不瞬。垂臂待我。已歷十劫。念念不捨。甚於剖心。乃至其心激切。入生死中。遍歷三道。地獄猛火不辭勞倦。我若迴心向佛。如子戀母。正慰所懷。則不逾當。念便得往生。何必更經十念之頃。然後得生。

斥妄顯真第二

行人欲生彼國。出離生死。先當深識求生彼土真妄之心。且謂如是極樂世界爲是在境爲是在心。若在於心。但有虛想無土可生。若在於境。雖有生處。又復失心。若謂心境二俱求生。則我身心是一。寧生兩處。若謂心境是一。一心求生。則自今心境宛爾。難說是一。又極樂娑婆淨穢不同。况是世尊垂教。敕令捨穢求淨。一義奚得。四句既不可求。或謂處處皆是西方極樂。或謂心淨則是極樂。或云極樂不離這個。若作

此解。皆名邪見。而余因不得以默矣。彼若謂極樂在心。即使妄認此心住在我今身中。既在身中。但名求心。何名求生。豈我世尊不知極樂在心。而說在西方于萬億國土之外耶。又豈不能指說內心。而但能說外境耶。今西方極樂世界阿彌陀佛現在說法。實境宛然。此是聖人誠言焉。敢不信。而不知此緣影心外之極樂。正卽是我真心。我此真心。如彼大海不增不減。而汝妄謂爲境。汝謂極樂在緣影心。此緣影心。如海一漚。生滅全妄。而汝妄謂爲心。汝若固執妄見。不

信外有極樂。信在汝緣影心內者。汝緣影心無體。不可以心求生於心。而不知彼極樂雖在西方。西方卽我真心。真心無性。卽彼名體以顯我心。名體本空亦卽我心。而示其相。心境一體。生佛同源。求彼佛。卽求自心。非外求也。究自心。須求彼佛。豈他惑哉。如是則取捨忻厭。熾然着相。任我所求。豈復外心。心能具故。則知此心圓裹一切依正境界。乃至色心淨穢。生佛因果。三世十方諸法。含攝無外。同一受用。求一外相。了不可得。雖無外相。不分而分。淨穢宛爾。故當如是。

而求豈可求之於妄心也。如是願求。佛所印可。與彼世之不識。本心愚癡。無智。不求西方極樂之佛。但向自己肉團緣影妄心中求。謂是唯心淨土。本性彌陀者。實遼遠矣。然彼極樂國土。非依緣影妄心。又彼彌陀色身。非在衆生陰體。若向我今四大緣影身心中。求本性自己之佛。不求西方極樂之佛。則妄心生滅。佛亦生滅。佛生滅故。三昧不成。縱求有得。但成生滅之佛。還生生滅之上。不成正行。經云。以輪迴心生輪迴見。彼圓覺性。亦同輪轉。卽此義也。若欲離諸妄見。

直生彼者。但求西方十萬億國土外極樂彌陀之佛。以稱性妙觀。如實觀之。使彼如來本覺相好於彼顯現。合我衆生始覺真心於此發明。始本相冥。生佛互感。三昧乃成。正行斯立。不生滅土始可生也。故知此心徧一切處。尚不間於地獄。何止極樂。但地獄苦處。今順性而求離。極樂九品。今順性而求生。但依修多羅教。順佛法音。求離苦得樂。從凡入聖。實不出吾之心性。故名惟心淨土。本性彌陀。非謂從妄心中求。妄心無體焉。得名爲惟心本性之佛耶。彼向自己緣影。

妄心中求者。以色身及山河大地。十方刹海爲外境也。此向自己不動真心中求者。卽十方刹海。大地。山河爲內心也。若知十方刹海。卽內心。則打成一片。故我任意於中捨穢取淨。厭東忻西。不出自心。以實有彼大願果。佛能接引故。故求無不得。若謂十方刹海爲外境。則打作兩橛。故纔動念。便乖法體。卽失其用。不得自心。以但有此性。具因佛無力用故。故雖求無得。又妄心但是虛妄緣影。惑爲色身之內。無土可生。真心含育一切塵剎。本具極樂。依正求之必生。妄心

捨外趣內。真心卽外爲內。內無外故。外求有相果佛。卽求自心。內非實故。內求無體緣影。不見自心。妄心。心境。宛然真心。卽心。卽境。妄心生滅。無據。真心不動。不搖。妄心在因。無果。始終生滅。真心因果一致。性修。交徹。故知從真心妄心求者。其別若是。論時則何啻日劫。相倍論處。則何但天地懸殊。論體真。則圓裹十虛。妄則居於身內。論田真。則橫截娑婆。直出生死。妄則煮砂爲飯。經劫難。是故行人發菩提心。求生淨土。豈可但求自己緣山。妄心不求西方極樂真佛。良

可痛傷。譬如欲西而面東。欲升而抱石。從水求火。從火覓水。奚可得焉。嗟乎。今之人。不識真心徧一切處。卽色顯體。而妄認緣塵影事。謂是本性。謬之甚矣。譬如有人認賊爲子。其家財寶必被消滅。分別影事。妄認爲心。亦復如是。若或識子是賊。賊不爲害。知意是妄。妄亦奚傷。但不可認彼爲是極樂。依正也。四明法智大師。所以有指妄卽真之說。觀佛觀心之談。終不揆於極樂。依正實境。奈何後世邪見蜂起。魔侶熾然。破滅佛法。斷佛種性。妄計極樂妙土。在我緣影心中。而

不肯西求可勝顛倒。彼閻巷之人。未聞正說。以此邪見密相傳授。疑悞人者雖不逃於地獄苦報。尚有可恕。而我出家四衆圓頂方服者。同此見解。尤可傷憫。倘若真爲生死。則必以此說爲是。若有障重之人。於此法門不能隨順者。則當更審緣影妄心境界云何。此虛妄心既無有體。但隨我生滅。遂卽妄認爲我。妄認我故。便謂此心住在我今色身之內。謂此色身住於今之世界。謂此世界還住今之虛空之中。此虛空性廣大難量。遍含塵刹。如是則空大界小。心劣於身。

一念轉微不可舉示。豈可以至微至末一念無體之妄心。而於此求極樂依正之妙境乎。不可求而求。豈不甚惑。旣了此義。則知如是空性無邊。雖不可量。元不出我大覺清淨心中。如彼片雲點太清裏。况諸世界在虛空耶。况此色身在世界耶。况此妄心在色身耶。故知妄微身著界大空圓從纖至洪。不出我今本心之內。故知我心如空。彼空如塵。我心廣大無涯無底。圓裹十方三世一切虛空微塵刹土。一切衆生色身妄念。欲求一法在於心外。了不可得。何特西方極

60 1 2 3 4 5 6 7 8 9

10 1 2 3 4 5 6 7 8 9

80 1 2 3 4 5 6 7 8 9

90

樂非心外耶。造次顛沛尚不可離。况淨行莊嚴要期西邁。透脫生死。豈求外耶。經云。認悟中迷晦昧爲空。空晦暗中。結暗爲色。色雜妄想想相爲身聚緣內。插趣外奔逸。昏擾擾相以爲心性。一迷爲心決定惑爲色身之內。不知色身外泊山河虛空大地。咸是妙明真心中物。譬如百千澄清大海棄之。唯認一浮漚體目爲全潮。窮盡瀛渤。汝等即是迷中倍人。如我垂手等無差別。又云。妙覺明心徧十方界。含育如來十方國土。清淨寶嚴妙覺王刹。又云。十方虛空生汝心內。

猶如片雲點太清裏。況諸世界在虛空耶。以是義觀既十方空刹依正色心是我本有。我今決志求生本有之土。求見本有之佛。有何不可而謂外求。我旣願求心能感故。彼佛爲我顯現之時。卽我自家底本有心佛顯現。心佛真實。何有外來。旣無外來。彼佛顯時。卽我心顯。我心顯時。卽彼佛顯。我心卽是彼佛之心。彼佛卽是我心之佛。一體無二。性本圓融。何可捨彼西方極樂内心之佛。而妄計別有惟心佛也。或曰。雖妄心豈不亦具依正之法。何必使人求乎境外。答曰。

妄心設具一切依正之法豈不亦具西方極樂。若知西方極樂一如娑婆之實境可求可說心具若謂此心卽是心外更無實境此則但是妄心虛想有何實焉而謂心具又卽境之心名真心離境之心名妄心故知真妄雖同卽離爲異卽得離失卽是離非其旨明矣。又如法師少康因念佛故稱佛名時佛從口出狀若連珠亦存其相使其衆會皆得見也。佛旣有相土焉不實更有一等謂於事則有於理則無或云處處皆是淨土傷哉此輩渙惑難祛又禪宗南陽國師

爲禪客舉無情說法之話雖不專言淨土旨趣亦痛末世向緣影求佛者多故此說中不得不備

阿謬解第三

念佛三昧名三昧王。境界甚深。幸難究竟。古今師授互有不同。至於天台。其說大備。慈恩賢首各引其長。企仰禪宗亦極明顯。但後學淺陋。莫得指歸。尚未升堂焉能入室。尋門未得。異見多途。遂將禪宗六祖大師壇經說淨土處。暗地搏量。隨語生解。便謂本無淨土。不必求生。而不知我大師非但所說隨機。實乃義

1 2 3 4 5 6 7 8 9 10 1 2 3 4 5 6 7 8 9 10

符經旨。縱隨其語。但言淨土不必生。亦不說無淨土。淨土既有生理。昭然何故。初機執指爲月。若依大師所云。迷人念佛求生於彼。悟人自淨其心。又云。東方人但心淨。卽無罪。雖西方人心不淨。亦有憊。東方人造罪念佛求生西方。西方人造罪念佛求生何國。凡愚不了。不識身中淨土。願東願西。悟人在處一般。又言。淨土遠近。但隨衆生善根不同。而佛土焉有遠近之異。是謂不必求生也。然要衆生永斷十惡八邪。具修十善八正。又令妙識心地性。王不離此身。但迷悟

有異。若悟則能行慈悲喜捨。能淨平直等善。卽是觀音勢至釋迦彌陀。若迷則分別人我。邪心虛妄。塵勞之殊。卽是須彌海水之境。龍鬼地獄之黨。今詳大師肯意。但能心淨。則隨處皆淨。實與維摩會上佛足按地變穢爲淨。其諸大衆各各自見坐寶蓮華義實無二。則經所謂隨其心淨。卽佛土淨。其說明矣。大師之辯。豈不稱可。佛心漢符經旨。但聖人說法遮表不同。其有位未至於此者。不可引彼遮詮而自詭也。况一大藏教或說遮詮。一切皆非。何必求生。或說表詮。一

切皆是必當求生。此二法說同出佛口。義無有殊。豈可偏執遮詮之說。頓棄表詮求生之義耶。若果直謂於土不必捨穢取淨。而但淨其心者。則大師亦當謂人但淨心而已。不必令人斷諸惡業。而修善行也。今既令人斷惡行善。則必於土捨穢取淨。其義益明。故佛說遮詮之時。正欲顯於表詮。令求生。說表詮時。正是依於遮詮。知無生。故知曹溪令人因心先淨。則報境自淨。不令求生遮詮也。廬山令入佛報境淨。則因心自淨。教必求生表詮也。然佛祖說法。因果不二。非

前非後。二義未嘗相離。雖使人所入不同。而法體本一。奈何今人纔聞遮詮之說。謂是便謂表詮之談。爲非。自生退障。良可憫傷。不知大師作此遮詮。不必求生之說。正是顯於表詮。令求生淨土故也。又如釋尊一代聖教。諸部歷談。無非一味。而於顯說法中。定多讚顯說。於密說義中。必特稱密說。各宗當部。而置別談。然佛豈無別談妙於此者。蓋欲應機。使衆會受持。得以一志。無猶豫也。今像季中扶宗樹教。豈無抑揚之時。六祖旣欲弘一行三昧。理宜杜絕諸乘。廬山特

欲闡念佛三昧使之橫超直截。正當圓攝羣機。後學
豈可妄生二見。宜詳審之。又謂東方西方之人心淨
無罪不淨有愆者。正謂東方惡境麤彊。佛已滅度不
能心淨。如俗在家火宅萬煎。縱修亦失。譬如小石入
水卽沉。故必求生西方。彌陀聖衆現在。境勝行深。逃
子旣回。佛親誨益。如出家在寺。善緣具足。決不退轉。
故生彼國。心淨無愆。如彼大石乘船入水不沉故也。
又東方西方理本一體。彼佛國土非但境勝。其佛現
在能除愆罪。心必清淨。聖地可階。故必遠勝娑婆須

求生也。若是根勝如曹溪會中者。尚能入生死大海。
尋聲救苦。教化衆生。何必求生。其或道力未充。妄効
先覺。自不求生。殺人亦不求生。譬如救溺無船。彼此
俱溺。可奈何哉。又我大師實弘禪宗之六祖。所說豈
非闡揚少室之禪。乃云心平何勞持戒。行直何用修
禪。若依此語。則謂不必持戒修禪矣。而不知心若平
則我待物無不平。物我旣平。豈可殺他。自養盜彼自
利。分男女相而行非行。語不真實。而更飲酒使醒醉
異時。心平旣無此犯戒之相。則一切戒皆在其中。豈

可全不持戒。與劫殺人等而云心平。是知作此心平。何勞持戒之語。正是顯於大戒也。禪字乃是梵語。此翻靜慮。或翻正定。或翻一行三昧。豈有行直之人。其心慮而不靜。其住定而不正。其行有不一者。是知何用修禪之語。正是顯於淡禪也。大師行超天人之表。道隆像季之間。恐後學著法泥跡。於戒體中說何勞持戒之語。於禪境中說何用修禪之言。例此則知亦於必當求生淨土法中而說不必求生之語也。後學猶轉泥跡。謂實不必求生愚之甚也。蓋大師所說。反

勸也。諸祖所談順讚也。非順則無以啓進修之路。非反則不顯圓頓之修。反勸順讚。悉應當時之機。無有實法。如云逢佛殺佛。豈真殺佛乎。若殺佛之語。是實則文殊仗劍。亦是真殺佛乎。苟隨古人之語。不求古人心。謂實不必求生者。正所謂醍醐上味。爲世所珍。遇斯等人。翻成毒藥矣。是故大師稱彼三諦圓妙之理。於有生中說無生。於無證中說修證。二邊叵得中道。不存合教。乘圓頓法門。坦然明白。如揭日月於昏衢。無不蒙照。而謂禪宗於念佛三昧淨土旨趣。有

所未盡可乎。若夫河西綽公長安善導信源禪師智覺慈覺豈非繼其後者皆能遠稟遺音方弘斯道道珍懷玉行業厥彰圓照諸師其驗益著况今禪林爲病僧念誦及茶毘十念稱佛名號俾其往生事載典章餘風尚在更奚惑焉

正明心佛觀慧第四

夫念佛三昧者實使羣生超三界生極樂之徑路也始自鶯嶺敷宣次羨廬山繼軌十方稱讚諸祖傳持自昔至今有自來矣但其說或不能一致後學不得不

其歸獨天台三觀法門理冠羣經超乎衆說稟教得
旨其益難思故後學不可不以此爲舟航也夫三觀
者一念卽空卽假卽中也自我如來恢揚至於智者
妙悟所謂空則一切皆空假則一切皆假中則一切
皆中俱破俱立俱非破立圓融絕待難議難思統諸
部之玄門廓生佛之境智極萬法之源底顯淨土之
圓修念佛三昧非此法門則有所未盡也四明大師
發揚妙旨以諭後學今悉用其語求生淨土雖不外
乎世間小善及彼事想若非以大乘圓妙三觀法門

釋彼十六觀經奧旨。使人開解起行。何由必生。十六觀者。初觀落日。所以先標送想向彼佛也。初心行人。雖了根塵皆是法界。而心想羸劣。勝境難現。是故如來設異方便。卽以落日爲境。想之令起觀中之日。圓人妙解。知能想心本具。一切依正之法。今以具日之心。緣於卽心之日。念本性日。顯現其前。斯乃以法界心緣法界。境起法界日。旣皆法界。豈不卽空假中。此猶總示。若別論三觀成日功者。以根境空寂。則心日無礙。以緣起假立。故累想日生。以其心日皆法界。故

當體顯現。日觀旣成。則三觀同在一心。非一非三。而一而三。不可思議。日觀旣爾。餘觀例然。應知十六皆用卽空假中一心三觀。以爲想相之法。次觀清水。復想成冰。良以彼土琉璃爲地。此地難想。且令想冰。冰想若成寶地可見。如上且以所見落日及冰以爲方便。次觀地觀樹。觀池。及以總觀樓地池等。已上六觀。皆所以觀彼土之依報也。至於觀華座者爲三聖之親。依觀寶像者類三聖之真體。欲觀於佛。先觀於座。真佛難觀。要先觀像。乃至普觀。往生雜觀。佛菩薩等。

七觀皆所以觀彼土之正報也。後三觀者。明三輩九品之人。自此而生彼也。既然修因不同。是故因果差降。今亦觀者爲。令行人識別三品優劣。捨於中下而修習上品。往生故也。然諸觀皆用經所示相憶持在心爲所觀境。仍了自心本具此法。託境想成發明心目。又經題云。佛說觀無量壽佛經者。佛是所觀勝境。舉正報以收依果。述化主以包徒衆。觀雖十六言。佛便周則當。但觀彼佛也。欲觀彼佛者。則當先觀彼佛。如虛空量端嚴微妙廣大色身。一一身分八萬四千。

相。一一相中八萬四千隨形好。一一好中八萬四千光明。一一光明之中。一世界海。彼世界海中一切十方諸佛菩薩聲聞緣覺僧衆。一一微妙廣大。不可具說。但當憶想。令心眼見。見此事者。卽見十方諸佛。以見諸佛故。名念佛三昧。作是觀者。名觀一切佛身。以觀佛身故。亦見佛心。佛心者。大慈悲是以無緣慈。攝諸衆生。作此觀者。捨身他世生諸佛前。得無生忍。又云。觀無量壽佛者。從一相好入。但觀眉間白毫極令明了。見眉間白毫者。八萬四千相好自然當現。見

無量壽佛者。卽見十方無量諸佛。得見無量諸佛故。諸佛現前授記。是爲徧觀一切色身相。故知十六妙觀。以觀佛爲要。八萬相好都想難成。故令但觀眉間毫相。如五須彌。此想若成。八萬皆現。此爲要門也。若修前諸觀。心得流利。觀已宏深。則可稱彼毫量而觀。使八萬相好自然皆現。疏中令觀劣應毫相。乃爲未修前諸觀者。及爲雖修觀未成者。故於佛身別示初心可觀之相。爲三昧門也。又慈雲法師。但令直想阿彌陀佛丈六金軀。坐於華上。專繫眉間白毫一相。其

毫長一丈五尺。周圍五十。外有八稜。中表俱空。右旋宛轉。在眉中間。瑩淨明徹。不可具說。顯映全顏。分齊分明。作此想時。停心注想。堅固勿移。此想若成。則三昧現前矣。是故觀佛三昧經云。若人至心繫念。端坐觀念。色身當知。心如佛心。與佛無異。雖在塵勞。不爲諸塵之所覆蔽。作是觀者。是真念佛。是知觀佛功德。其事如是。又彼世尊。相好光明微妙。廣大衆生狹劣。想念難成。佛令於真身觀前先令想像。佛必坐座。又先觀座。座觀若成。則當想像。經云。諸佛如來。是法界

身入一切衆生心想中。是故汝等心想佛時是心卽是三十二相八十隨形好。是心作佛。是心是佛。諸佛正徧知海從心想生。是故應當一心繫念。諦觀彼佛。夫法界身者。報佛法性之身也。滿足始覺。名爲報佛。究顯本覺。名法性身。始本相寘。能起應用。然非衆生能感。則諸佛亦豈能應。能感如水能應如日。是故始覺合本。猶白日昇天。應入淨想。如影現百川。有感有應。此二道交。是爲入衆生心想之義也。又法界身者。卽佛身也。無所不徧。故以法界爲體。若能得此觀佛。

三昧。則觀解心契入佛體。佛體入觀解心。斯乃始覺解於本覺。是故本覺入於始覺。有解有入。此二相應。是爲入衆生心想中也。當知今之心觀。非直於陰心觀。本性佛。乃託他佛以顯本性。是故先明應佛入我。想心次明佛身全是本覺。故應佛顯。知本性明。託外義成。惟心觀立。二義相成。是今觀法。又經中云。是心作佛。是心。是佛者。所以示今觀佛。當明修性。不二之旨。言作佛者。此有二義。一者淨心能感。他方應佛。謂諸佛法身。本無色相。由衆生淨心。依於業識。薰佛法。

總角正批

身故能見佛勝應色相。二者三昧能成自己果佛。謂衆生以淨心想成就觀佛三昧故能使自己終成作佛。此之二義。初作他佛。次作已佛。當知果佛從證非是自然。卽是而作全性成修顯非性德自然是佛也。言是佛者亦有二義。一者心卽應佛。前言性本無相。心感故有。則心佛有無條然永異。今泯此見故卽衆生之心。全是應佛。以離此心外更無佛故。二者心卽果佛。旣心是果佛。故知無有成佛之因。以衆生心中已有如來結加趺坐。豈待當來方成果佛。此之二義。

初是應佛。次是果佛。當知果佛本真。非從緣成。卽作而是。全修成性。顯非修德。因緣成佛也。若以作是顯於三觀。則空破假立。皆名爲作。二邊之觀也不破不立。名之爲是。中道之觀也。全是而作。則三諦俱破。俱立。全作。而是則三諦俱非破立。卽中之空假名作。則能破三惑。立三法。故感他佛三身圓應。能成我心三身當果。卽空假之中名。是則全惑卽智全障卽德。故心是應佛。心是果佛。故知作是之義。一心修者。乃不思議之三觀爲十六觀之總體。一經之妙宗也。文出

此中義遍初後。是故行者當用此意修淨土因。或曰。
何不依經所說惟以事想直生淨土。乃顯慧觀之門。
使初心難入耶。答曰。觀慧事想乃至人中微善。但得
一心皆可生於淨土。但麤妙之不同耳。麤則惟彼事
想妙則專乎心觀。疏云。良以圓解全異小乘。小昧惟
心佛從外有。是故心佛其體不同。大乘行人知我一
心具諸佛性。託境修觀佛相乃彰。今觀彌陀依正爲
緣。熏乎心性。心性所具極樂依正由熏發生。心具而
生。豈離心性。全心是佛。全佛是心。終日觀心。終日觀

佛。其旨明矣。又應了知法界圓融。不思議體作我一
念之心。亦復舉體作生。作佛作依。作正作根。作境。一
心一塵至一極微。無非法界全體而作。既一一法全
法界作。故趣舉一。即是圓融法界全分。旣全法界。有
何一物不具諸法。以一切法。一一皆具一切法故。是
故今家立於惟色惟香等義。又云。毘盧遮那徧一切
處。一切諸法。皆是佛法。所謂衆生性德之佛。非自非
他。非因非果。卽是圓常大覺之體。故知果佛圓明之
豐是我。凡夫本具性德。故四三昧通名念佛。若此觀

門託彼安養依正之境用微妙觀專就彌陀顯真佛體雖託彼境須知依正同居一心心性周徧無法不造無法不具若一毫法從心外生則不名爲大乘觀也又仁王般若經云佛問波斯匿王汝以何相而觀如來王言觀身實相觀佛亦然無前際中際後際不住三際不離三際不住五蘊不離五蘊不住四大不離四大不住六處不離六處不住三界不離三界乃至非見聞覺知心行處滅言語道斷同真際等法性我以此相觀如來身佛言應如是觀若他觀者名爲

邪觀此義益明矣又云若其然者何不直觀彼土真身之妙而又此經教人先修像觀耶答娑婆教主稱讚樂邦務引衆生出離五濁教觀彼佛六十萬億那由他由旬之法身而先之以華上寶像者開示方便使觀麤見妙也繼之以丈六八尺之像者隨順下凡使觀小見大也蓋麤妙異想悉從性而起修小大殊形咸自本而垂迹能觀之性初無差別所觀之境寧可度量是故圓頓之談一音普被開示其次第而非漸隨順其根器而非偏並啓觀門全彰實相像教之

源豈不在茲。此是念佛三昧單提直截之旨。始終不二之談。大乘圓頓之道。如日月普照天下後世。使知真妄之心。卽一而不同。而理有所詣也。可謂不離日用解行觀慧。悉皆具足。學者可不盡其心哉。

道場尊像念佛正觀第五

夫觀慧三昧者。當以斯觀慧之旨。觀彼極樂依正。使此心純熟心。境理一而直生於彼土也。道場正觀者。以彼雖達觀慧之旨。而六根所對尚畱塵境。或有退轉。故於道場聖像乃至莊嚴供具。卽與極樂依正一

體而觀。行人雖未離娑婆。以此心觀一。故如已生淨土矣。於命終時。莫不感應。且如行人懺悔行事清淨。道場莊嚴供事。至於一香一華。豈不卽彼三諦之理。若不以此諦理事事之中。正念觀察使勝行有歸。則於大乘圓頓之道。不能開顯。如彼佛土有無量一一莊嚴之具。皆從彼佛初修菩薩行時因行所感。因行既立果土現前。故莊嚴具勝妙無盡。我今觀果知因。則知三昧道場一一莊嚴。與彼極樂因果無二。豈不亦各各成大三昧。顯諸法門圓融微妙。如極樂土等。

無差別。亦自卽彼嚴具爲妙身相。身相供事。非彼非此。非一非多。依正互融顯法界理。如諸佛土不可思議。豈可視爲土木所成境耶。故知或境或心或身或土。同一受用。自在無礙。經云。以波羅蜜所生一切寶蓋。於一切境界清淨解。所生一切華帳。無生法忍。所生一切衣。入金剛法無礙心。所生一切鈴網解。一切法如幻心。所生一切堅固香。周遍佛境界。如來座心。所生一切寶衆妙座。供養佛不懈心。所生一切寶幢。解諸法如夢歡喜心。所生一切佛所住處寶宮殿。無

著善根。所生一切寶蓮華雲等。以是觀之。則知極樂依正之境。乃是彌陀如來因行所成。今感其果。我此道場。既是生淨土因。勝劣雖有不同。如海如流。而其氣分。豈不與同體耶。因是義故。則道場中六根所對。香華燈燭。勝旛寶蓋。一切供具。乃至衣服卧具。飲食醫藥。諸受用具。一色一香。及一微塵。無非三昧。無非法門。皆能使人發乎妙解悟心。證聖雖未聞音。亦能表現念佛三昧。諸大法門。亦卽一切生佛之身。境智無礙。亦能與我同行爲真法侶。行人敢輕視之。使不

發妙悟俱生彼國可乎。經云。禪定持心常一緣智慧了境同三昧。義亦若是。能作此觀則根境一致。何但我之三業爲能修也。又如地獄苦具刀杖劍火。以彼先造惡因所使皆能搖動爲蛇爲狗爲蟲爲鳥穿骨入髓作諸苦事。况道場中諸莊嚴具而不依正同源皆解脫法與我共成三昧者乎。又道場莊嚴形皆異物尚能使人發乎妙解。况今所奉尊像恭敬供養盡心竭志。如父如母。豈不能令我解脫速生安養。且如一佛二菩薩像置道場中爲的對懺悔之主。餘像是

伴總名爲正。諸莊嚴具悉名爲依。是則主伴依正與彼極樂依正雖麤妙不同而其像主所有神通願力同佛真身。扣之則靈求之則應。有何差別。旣無差別則於此像豈可但作土木膠漆金彩所成之見而不作西方極樂大願相好真身之佛觀耶。若於像中不見真身則其心不一。三昧難成。妙悟不深失之甚矣。蓋今所見之像與彼真身實無二致。但以彼佛大慈普偏於無二身隨機應現示真示化或示形像而我亦眼障尚深於一法中所見自異於佛真身而謂像

耳。則知此像豈實像哉。譬如觀經三輩九品接引之佛。隨其品位所遣從勝至劣各各不同。故知我所見像實亦當我所見。豈佛慈不普而示我以像哉。雖然見有不同。皆卽彌陀一體。又如經說。懺彼眼障漸薄。見佛座已。先見一佛。二佛。障又薄時。漸漸見佛遍虛空界。以彼例此。若我懺願求生之心與理相應。先見佛像及化後能見佛真身。又如華嚴會上佛體本一大菩薩衆。見佛是廣大無量天冠莊嚴舍那之身。三乘見佛是王宮降生老比丘身。我等凡夫。故應見佛。

是土木所成之身。不爾云何普賢觀經。但懺眼罪而得見佛。是知佛本一體。或真或像。實見者自異耳。又昔有人刻木爲母。母身本木。人有借覓於母。或與或愒木母。亦能形喜極色與真母同。彼世間孝意所感。尚能若是。况我無量大願神通之佛。卽真寶像。不及木母者乎。况古今造像徵驗不一。或放光明。或示瑞應。乃至身生舍利。水溺火焚不壞者。載之傳記。不可具陳。則我道場像王。卽是彌陀如來真實色身。而我障故。謂是像耳。縱彼直謂是像。亦能入前像觀。從像

若於相非佛。何止於像。雖舍那報身亦非是佛。若一切非佛。卽一切是佛。何非佛耶。若知此義。則悟我今所奉尊像。不離願海。具大神力。能攝能受。所有一切力無畏等十八不共大慈大悲。常樂我淨。相好光明。與彌陀全身等無差別。而我於中懺悔行事。當如乞人得近帝王。常懷慚戰。畏愛兼抱。渴仰攝受。冀求出離。况復歷劫難遇。今旣遭逢。豈可輕易使勝行不進。自作障難耶。又念彼佛哀憫我故。垂示像身。受我懺悔。旣受我懺。則一切重罪定得消滅。必生淨土。於是心得歡喜。忽如天廓地清。獲得法眼。彼極樂國可如目覩。故知真像一致之說。非不甚深。學者宜盡其誠。莫作異解。

闢斷空邪說第六

釋迦如來一代聖教。一本於善惡果報。因緣諸法。爲始終不易之正教也。雖有百非超脫之句。豈必離乎。

因緣法哉。奈何今時有一等斷人善根極惡闡提之輩。不識佛祖爲人破執除疑解粘去縛之談。隨他脚後跟轉。妄謂除此心外。諸行皆空。無佛無法。非善非惡。錯認妄識是真。謂此心外無法可得。遂卽撥無因果排斥罪福。言一切菩薩諸佛形像。祇是個金銀銅鐵土塊木頭。一大藏教。亦祇是個樹皮。揩不淨底。故紙本非真實。何足依憑。於一切善行功德。無不一一掃除。謂言著相。一路談他之短顯已之長。或存所叅話頭。而又謂不可固執。索性使人內外空索。宗豁達。

地了。卽乃潛行諸惡及姪怒癡等。反謂於道無礙。自賺賺他。內心腐爛。殆不可聞。譬如師子身中蟲。自食師子身中肉。此等見解。其類甚多。必是天魔波旬。昔恨未消所遣來者。令同我形服壞我道法。而無遺餘。嗚呼痛哉。若如彼見。謂形像非佛。不知何者是佛。紙墨非經。不知何者是經。若自心是佛。何物非心。而獨謂聖人之像非心。非佛耶。又心既是佛。何人無心。而獨謂汝心是佛。使人非像。非經耶。不知衆生之心。全體在迷。必假聖人形像經法。而表見之。使人有所悟。

解也。若有悟解。則識生佛真心。平等徧一切處。經云。諸佛說空法。爲度於有故。若復著於空。諸佛所不化。又云。寧可說有。如須彌山。不可說無。如芥子許。縱證空法。猶滯小乘。豈能如大菩薩等。從空入有。證於俗假。於衆生界。如佛度生者也。是故小乘空見。是大乘菩薩所棄。佛說空法。是未了義。又佛說空法。乃卽有顯空。空不離有。得名真空。今人說空。離有方空。空成斷見。淡爲可畏。如陷坑窪。永不可出。永嘉云。棄有著空病亦然。還如避溺而投火。斯之謂也。善星比丘妄

說法空。寶蓮香比丘尼私行婬欲。生陷泥犁。豈不是後人龜鑑。後人不以爲戒。復蹈其已覆之轍。如盲引盲。衆使師及弟子自甘沒溺。可悲甚矣。又若孝子聞父過惡。以承彼生育之恩。猶尚不忍。况我釋氏之子。負出世恩。於佛形像法言。恣意輕毀。安然不懼。可不痛傷。此人必向五無間獄大熱猛饑之中。各各自受今日謬解之報。豈虛語哉。縱是德山丹霞。亦但如文殊等一時爲人破執顯理耳。豈欲以此教後世耶。今爲其後者。不識先人之方便。更與彼已吐之唾。一向

謬謂拆佛殿燒木佛是究竟之道。可謂顛倒。若遵彼遺說。惟能燒拆便是道者。今天下釋子皆當如文殊師利以劖自隨。有佛殺佛。無佛斫像。即是道矣。更不須以佛所傳定慧等學而爲道耶。又佛法門得久住者。全賴經像形服威儀善行乘法而已。不知捨是何據而得久住者哉。是故佛說於諸經像敬之不至尚獲大罪。况更輕毀罪逆可知。妙經有云。提婆達多昔作仙人阿私陀時爲釋迦師。釋迦自以其身而爲床座。奉上供養。令我具足六度相好金色無畏攝法。乃

至不共神通道力成佛度生等者。皆因達多善知識也。今釋迦已得證果。欲相成其道。不說法空。但逆讚其法。微損佛足小指。尚不逃於地獄長劫之痛。何况後五百歲。斷人善根。妄說法空者。豈能免苦果耶。又佛說法空。蓋欲令人體空斷惡。奈何不識佛意。而反滯空退善。豈不顛倒。又彼於諸不善尚說無礙。不知善法何礙。而欲不修。古人以不落因果答學者。問尚五百世墮野狐身。非百丈老人不能脫之。况今妄說法空。撥無因果。不懼後世恣意妄談。非止毀於經像。

又將素食之人比之牛羊。說法之人叱爲虛解。罪將安極。不知慧解如人之目。道行如人之足。有目無足。雖見而不能行。有足無目。雖行而不能見。以不見故。必墮坑塹。以不行故。奚到寶所。雖不能到。還識是非。既墮坑塹。身命俱失。如經所謂五度。如盲般。若如導。以如盲故。行必墮凶。以如導故。必到寶所。豈可反叱。經教之談爲虛解也。然則解行雖各爲要。設使有行。無解。莫若慧解爲優。譬如羅漢應供。象身挂纓。其義可了。又若有解。無行。菩提可發。有行。無解。難會圓乘。

故知文殊解。深爲諸佛之師。普賢行。太作羣生之父。豈可偏滯一隅。而自執也。禪宗南嶽。尚以不似一物。不無修證。不可污染。爲悟道入門之要旨。况今人邪見。若是之深。豈不速疾陷於極苦之處。楞嚴云。自謂已足。忽有無端大我慢起。心中尚輕十方如來。何況下位聲聞緣覺。又云。忽然歸向永滅。撥無因果。一向入空。空心現前。乃至心生長斷滅解。不禮塔廟摧毀。經像。謂檀越言。此是金銅。或是土木。經是樹葉。或是疊華肉身。真常不自恭敬。却崇土木。實爲顛倒。其深

信者從其毀碎。埋棄地中。疑惑衆生入無間獄。失於正受當從淪墮。則知世尊於妄說法空之人。及未得謂得未證謂證者。預已授其入獄之記明鑑若是。今人豈能逃佛所記哉。或曰。彼達多入獄無苦我奚畏焉。不知達多因心欲逆讚釋迦之道。故在地獄。非但無苦。且如三禪天樂。然以身口似謗故在地獄之中。還如身口所作。具受無量種苦。佛師尚爾。况今人効之。使人於經像間不生尊敬。視猶土木。待如故紙。令彼不識。因舉薄於罪福。遠佛教誠。近五逆行。如是惡。

報其能免乎

開示禪佛不二法門第七

釋迦如來所垂念佛法門。統法界羣機而無外者也。實文殊普賢所證大人境界。天台四明判與華嚴法華同部。味屬醍醐。卽禪宗所謂單傳直指之道。永明四料簡中。謂無禪有淨土。萬修善人去。但得見彌陀。何慮不開悟。誠向上一路也。奈何今人。因於名利所謀。不遂其志。乃作色長歎而自悔云。噫。我平生一切都罷了。參禪非我所望。不如且念些阿彌陀佛以度。

生世苟不折本足矣。於是反怠其身。曾未深省。倘或忽遇些些兒得志趣。便自無量惡作。依舊一時現前。莫之能禦也。念佛如此。何益之有。今詳其見。彼謂參禪雖妙而難。如造萬間大厦。念佛雖麤且易。如作一隙草窟。見地若此。譬如饑世。得遇大王百味珍饈。認作草菜之食。以如意珠王。視爲魚目。可不哀哉。不知禪佛二門。發行雖異。到家一著其理。是同當知。所以發行異者。如參禪拈來即是。不著佛求。然若自不能具正知見。又不遇正知見人。縱不退轉。多入魔道。無

佛力救護故也。若念佛。一切不取。惟念彼佛。雖無正解。及師友開發。但直信有佛身土。發志卽生。縱滯邪小。亦還於正。有彌陀願力救護故也。是名發行有異。非謂法門地位深淺有異也。是知參禪卽念佛。念佛卽參禪。禪非佛不得往生。佛非禪不得觀慧。念佛參禪。豈有二致。若知此義。則當乘彼功名富貴。得志之時。一刀割斷。卽便猛發大心。力行斯道。於世所有妻子寶貨頭目髓腦。乃至身命。不自愴惜。決志求生。豈可直待悔吝失節。不得已之際。以此最上法門。但作

草窟魚目小道之見。以苟且之法而欲修之可傷可惜甚矣。若能因是悔吝從公一時放下。生大乘寶所之見。辨決定不退轉心。譬如隨風順流之舟。更加櫓棹。豈不疾有所至。何幸如之間。若是則禪書有云。如何是佛答乾屎橛答麻三斤。云我當時若見一棒打殺與狗子。喫貴圖天下太平。乃至魔來也。殺佛來也。殺且道與念佛三昧。尊敬戀慕畏愛渴仰之心。及到家之吉。如何同耶。答念佛者。本持念佛西方極樂世界報身阿彌陀佛也。此佛報身有無量相好光明化。

佛菩薩聲聞願力功德不可具說。此爲佛身。又佛所依境有諸寶池地樹幢網欄臺鈴旛華水等一切莊嚴。此爲國土。然彼佛以身爲土。以土爲身。身土無礙。心境圓通。或彼或此同一受用。乃至蘊入界處。一切諸法直至無上菩提。及能殺所殺之義。一切時。一切處。無障無礙。非縛非脫。縱橫逆順。皆卽彌陀清淨色身。何以故。心卽境。境卽心。身卽土。土卽身。生卽佛。佛卽生。此卽彼。彼卽此。及青黃赤白之色。眼耳鼻舌之根。如是諸法。或心或身。亦一一無不自在。無不解脫。

尚不間於姪怒癡是梵行塵勞儔是法侶。何特乾屎
橛麻三斤非是佛耶。此既是佛何須於淨地上特地
示現降生挖肉做瘡起度生想如此正好一棒打殺
與狗子喫却省得許多作模作樣六年苦行降魔說
法於無生滅平等法中唱生唱滅賣弄千端攬動世
界憤亂一切使平地上死人無數豈不天下太平。嘆
到這裏切忌錯會不得動著動著則喫我手中痛棒
有分若謂此說是曹溪門下搵搔堆頭觸着得底且
未曾夢見在我早打折你驢腰問恐不容汝如此計

較答亦不外此計較又汝莫謂計較有心計較無心。
我幾曾計較來問只此早是計較了答我適來說什
麼底問者不會良久又問若一切都是佛則糞箕苕箒
皆可酬彼所問何特以極劣乾屎橛而作答耶答既
一切是佛則門窓戶闌目前諸境皆可爲問何特取
最勝之佛而爲問耶故知問者心地本純未取其高
而答者欲破彼執反取其劣耳若知屎橛非劣則佛
亦且非優豈可謂彼語有不同而妄認禪佛爲異行
哉問此念佛法門若如此奇特與少室指心成佛之

說台宗觀心觀佛之談初無有異。可謂不出一念顯三千妙法而三觀宛然不離萬法。究一真如門而一心頓了。且教我鈍根後學之人。如何修行得相應去答。但肯發行何慮不成譬如空谷之間有聲皆答。聲大則大鳴聲細則細響。隨彼發聲無不克應。正如樂國以三輩九品攝受衆生。亦隨其根利鈍深淺邪正遲速而導之。應生何品無遺機矣。如谷應聲高低共作。若能勤加精進。必不唐捐。又况時無先後。何嫌鈍根。以是義故。則知一切法門卽一法門。一法門卽一

切法門。豈特禪佛不二。舉釋迦一代施化之道。不出念佛一法門矣。又此法門量廣大。故攝機無外。何間愚智之根。奉勸後賢。於此法門莫生異見。

示諸佛二土折攝法門第八

夫二土者。卽諸佛折攝二門也。行人聞上所說。依正之境。則能如彼經旨。了知此土實苦。彼土實樂。雖聞觀慧法門。圓融微妙。而直見二土儼然。皆卽實境。非如淺信之人。謂彼土心有則有。心無則無。光影幻化虛妄。不實處處。皆是西方等解。深知彼土亦如此土。

端確的實而無謬悞。若人能具此智不爲世間一切邪解偏見諸惡知識之所回轉。則當正觀二土苦樂淨穢於其境上生二種心以爲方便。非此二心不能生彼何謂二心。一者厭離心。二者忻樂心。於此娑婆生厭離故。則能隨順釋迦所說折門。於彼極樂生忻樂故。則能隨順彌陀所示攝門。以此二門精進修行。念佛三昧必定成就。何謂折門。以聞如上所說極樂勝妙。則應如理觀察。此娑婆世界皆苦。無一樂者。三塗地獄。日夜燒然。餓鬼旁生不可堪忍。修羅忿戰。人

處何安。根塵與八苦交煎。因果共四生昇墮。時有寒暑。境是沙泥。晝夜推遷。無常不住。又復受身臭穢。男女異形。所需衣食艱難。麤惡壽命不永。衆苦相生。縱有生於天宮。報盡還歸極苦。又不知人中樂。即是苦親。正是冤顛倒攀緣。不求出路。從業致業。展轉不休。如是苦惱。不可具陳。故當厭離也。何謂攝門。行人聞說娑婆實苦。如是則於彼土西方極樂。生大忻樂。彼極樂土寶地寶池。無三惡道。莊嚴妙勝。超過十方。無寒暑晝夜。推遷無生老病死結業。純男無女蓮華化。

生衣食自然能成法喜。壽命無量。身光莫窮。聞法音。則應念知歸覩相好而刹那悟道。如是種種快樂無量得名極樂。故當忻樂也。若能於此一門精進修習。日夜不休。隨順佛教。於此土聲色諸境。作地獄想。作苦海想。作火宅想。於諸寶物作苦具想。飲食衣服。如膿血鐵皮想。於諸眷屬作夜叉羅刹。敗人鬼想。況復生死不任長劫奔波。實可厭離。於知識若經卷中。聞彼佛願力。國土莊嚴。於念念中。稱彼理趣。生安隱想。生寶所想。生家業想。解脫處想。彌陀如來菩薩僧衆。

如慈父想。如慈母想。生接引想。生津梁想。於怖畏急難之中。稱名卽應功不唐捐。刹那便至速來救護想。應念出離想。如是功德無量。實可忻樂。若於此折門不能修行。厭離不深。則娑婆業繫不脫。若於彼攝門不能修行。忻樂不切。則極樂勝境難躋。是以行人欲生淨土。成就念佛三昧。當齊修二門。爲發行最初一步也。若不修此二門。雖了觀慧之旨。但成虛解。縱欲生彼以不忻厭。無因可得。若能修此二門。不識觀慧之旨。雖可生彼。但事想故位非上輩。若能熾然忻厭。

圓修觀慧既生而復上品者矣。學者豈可謂此說固執着相而輕棄也。或曰何不諸緣放下。一念萬年。使心與理會境與神融。自然合法。何必忻厭取捨若是之淡。答若謂諸緣放下是道。只起一念放下之心。便不名爲放下。却與道反遠。類於斷見外道。故鵝湖云。莫祇忘形與死心。此個難醫病最淡。又云。若還默默恣如愚。知君未解做工夫。又佛十八不共法中有精進無減。又六波羅密因精進故方得成滿。且放下者。但放下世間業緣耳。豈是放下精進體道之心哉。古

人所謂坐在無事甲裏。正是此輩。若謂放下自在。是道而不勤加精進。一心修行。豈得心會境融。打成一片。與道合耶。若知不放下是放下。熾然忻厭取捨。即是不忻厭取捨。修卽無修。念卽無念。則名無功用行。亦名無作妙心。奚難速證中道之理。又修故離斷。無修離常。斷常既離。則異乎所問。而直生安樂世界。以三大士爲同修。日與彌陀佛相對。彼時知何法而不可問。何行而不可學。何疑而不可除。何求而不可得。旣無退轉。則此忻厭。豈不是成無上正覺之大因行。

哉

勸修第九

夫淨穢同心。生佛一理。諸法本等。笑假勸修。其奈衆生迷心作境。淨穢斯分。對待相成。縛脫迥異。纏縛多劫。不覺不知。故須勸娑婆苦海衆生。求生西方極樂世界也。行人旣聞如上所說二種法門。則必深知淨穢苦樂之土真實不謬。便當發行求生。如彼農民。得利自趨止之。不可得也。然彼農民近爲一歲饑寒之苦。尚甘日夜不休。朝愁暮苦。具經年載而不自倦。况

彼三昧行者。若一念精勤。超歷劫娑婆之苦。何止一歲饑寒。登九品極樂之安。何止一年溫飽。以彼較此。優劣可知。是尤不必待人勸也。又前示人折攝二門。其旨已明。如云此是金玉。此是砂石。雖三尺孺子。亦必棄石而求金。不勸而自取。蓋因識其貴賤。行者亦爾。旣明識此。土是苦。彼土是樂。此是生死沉溺。彼是自在解脫。亦必捨此穢土。而求彼淨土。自然念念不住。心心不息。如救頭然。聞教便行。奚待更勸。苦樂二字。是佛所說。諦信不疑。修則自得。今人見屎尿則必

60 1 2 3 4 5 6 7 8 9 10 1 2 3 4 5 6 7 8 9 10

擣鼻攢眉嫌其臭穢。便欲速去。見錦綺則必舒顏展笑。食其瑩潔。便欲速得。彼暫時美惡幻境尚不能一忍而憎愛熾然。况長劫極樂極苦之處。而不速生忻厭。可謂愚之甚。惑之深矣。又此娑婆世界釋迦已滅彌勒未生。賢聖隱伏。一切衆生奔波苦海。猶失父之兒。若不以極樂願王爲歸。則誰爲救護。又况此界六道雜遷。人天雖優報盡。則墜今且以人處暨修論之。彼神仙之黨。未離空地。尚不易至。况彼天乎。彼生天者。以三品十善之因。生三界天。自劣至優。各歷多劫。

不能如願成小敗廣如海如滴。中間或遇邪惡魔黨。永退永失。敢言得出三界而望四果四向之地。况歷信住行向諸地而超此耶。若能修此念佛法門。求生淨土。雖在凡地。不出一生。即便橫截三界五道生死。徑超諸有。蒙佛接引。頓生安養。於彼上品蓮臺托質。花開見佛。聞法悟道。不離當念。闊步大方。供養一切三寶。教化一切衆生。彌勒世尊降生之時。再來此地。同佛弘慈。所有歷劫父母妻子兄弟姊妹冤親等境。論以道品。告以昔因。皆令證果。則其行願豈不廣大。

耶。此娑婆世界所有三障。一切結業更不能累我。如是功德。若一念失修。便屬後世。豈宜自緩。况又世事千端。生緣萬擾。如鎖如釣。連環不斷。心則念念不任。身則在在無休。役我升沉。障我本性。歷劫至今。曾未休息。無常遷變。不可久留。縱壽百年。不逾彈指。今日明日難保其存。忽於眼光落地之際。不覺剝那異生。隨其業因。受形別類。披毛戴角。着地飛空。今日見解。都忘恍忽。三途六趣。飄零多劫。不知自歸。可謂大苦。縱是彌勒出世。而我生處何知。尚不聞父母三寶名。

字。何況經教圓談。雖受異身。保惜深重。因業致業。從冥入冥。懼死貪生。不異今日。若非卽於目下當念之間。効彼先覺丈夫。猛發大心。立決定志。奮揚舉鼎拔山之力。一截截斷跳出稠林。使兩頭撒開中間放下。安能行業昭著。光動人天。羣有蒙恩。諸佛護念。閉三惡趣。開總持門。即使不待娑婆報滿。使得往生者也。若又更待處所穩便。衣食豐饒充足。香華事事稱意。思前算後。卜彼良時。報盡恩冤。圓成善事。然後發行。假使虛空界窮。亦無此日矣。所謂晴乾不肯去。直待

雨淋頭古云。卽今休去便休去。欲覓了時無了時。斯之謂也。

寶王三昧念佛直指卷上

勸戒殺第十一
四明鄞江沙門妙叶集

寶王三昧念佛直指卷下

勸戒殺第十

相國裴公美休嘗著圓覺經疏序。其略曰。夫血氣之屬必有知。凡有知者必同體。所謂真淨明妙。虛徹靈通。卓然而獨存者也。以是觀之。則知蜎飛蠕動至微之物。及彼大身師象巴蛇之類。與十方佛圓覺妙心。虛徹靈通。同一真淨。奚可分優劣乎。生佛旣同。人雖至靈。豈不亦與彼等同一體性。共稟四大五行之質。

同生天地之間。如虛鼠危燕之類。上應乾象。肖乎日月。反能司人災福。焉得不及人也。此理旣明。乃知人與物類。性均天倫。彼旣無別。豈可逞我一時之強暴。乘彼之微弱。而恣行殺戮哉。又彼所以異於人者。但因無始妄想。極重惡業所牽。故不覺不知。改頭換面。異類受形耳。非謂心體有異也。體旣無異。又與彼類俱在生死。云何析其皮骨。潰其血肉。腸胃肝膽。或稱量買賣。煎煮百端。咀嚼其軀。悉取甘美。於一時間。飲我貪饕。適我口腹。曾不顧懼。未來惡道長劫之痛。可

謂失之甚也。人雖或謂優彼。但業對未至耳。豈真優於彼哉。况彼類中。有報盡當爲人者。爲天者。有聖人。諸佛菩薩。示同其類者。我障不識。奚可殺彼。所極愛重之身命。資我片時之口欲。忽爾人業報盡。反有不及彼者。奚謂彼類是我食啖而定不及我乎。又况我身昔同彼類。彼類同我。於類類中。亦曾互爲父母兄弟妻子姊妹。諸親眷屬。形體變流。心亦迷沒。不復相識。妄謂彼劣。今殺食之。卽殺我父母先親眷愛。又我身不離四大。亦殺自己四大故身也。又佛言。一切衆

生皆有佛性。以未來必成佛故。尚當供養給侍。如父母想。奚忍殺之。若殺之是亦殺未來佛也。可不懼乎。嗟今傷殺之人。不識先因爲親之時。於逆境中多生違逆。從親起冤。從冤結恨。冤恨連讐。世世不失。於是相生相殺。展轉不已。如彼海潮盈虧往來。不能自止。審彼約已。可不痛傷。故梵網經中。既禁自殺。乃至教他方便讚歎誓呪等殺。及因緣法業皆制令永斷。此佛誠教誡也。我若不止相呑食者。則必令彼佃獵漁捕。惡求之人。展轉滋多。使水陸空行。一切衆生藏竄。

無地纔入其手。毛羽鱗甲。一時傷毀。哀聲未絕。便供食啖。或易他物以養吾體。豈知一切物類怕死貪生之心。本與我同。若能知是先親。同斷殺業。亦能全乎孝道。經云。孝名爲戒。卽戒殺爲孝也。且彼物類性具先知。避不擇時。逃不擇處。况復天地寬闊。亦有自養之處。今故不能自生。而兩恰相值。必入人之手者。蓋以先因不可逃耳。先因旣不可逃。今因自當深思痛戒。倘或不戒。則彼此殺害之業。必如前牽入其類。亦安可逃耶。經云。假使百千劫。所作業不亡。因緣會遇。

時果報還自受。豈虛語也。故我世尊滿淨覺者。現相人中。於諸法會。以此戒殺之訓。叮嚀告誡。非不再三。且以此戒列於諸乘之首。於梵行中。非不嚴切。又復示現琉璃大王盡殺釋種。佛亦頭痛。及金鎗之報。垂誠於世。欲使人知因果難逃。而同止其殺也。可不信乎。或謂佛必無此。而爲物示此者。則聖人有誑人之過。佛旣無過。此奚不實。此旣是實。佛自尚爾。何況於人。故知報償之理。如影隨形。又如世人。平生友善。但或一言之忤。一物之負。尚結冤至死。况加以白刃。恣

食其肉。可忘深恨乎。且彼世尊。亦有不合圍。不捨羣釣而不綱弋。不駐宿。及聞其聲。不忍食肉之訓。正與吾佛三藏漸教。許食三種淨肉之說頗同。雖不如大乘方等。盡止殺業。亦止殺之漸也。止殺之漸。尚有至德及禽獸之譽。何況口悉素餐。身必麻襦。意專慈忍。不暴一物。使各遂其生。豈不德化無邊。可稱譽也。且古聖尚不肯暴露枯骨。枯骨無知。心猶不忍而葬之。何況有命血肉同靈之物。乃可殺食耶。老子曰。馳騁田獵。令人心發狂。又曰。射飛逐走。發蟄驚巢。縱暴殺

傷非理烹宰。乃至行住坐臥。舉動施爲所傷殺物。其於天地空中。必有司命。欽承上帝好生之德。隨其輕重。悉筆記之。毫髮無失。使彼生則減紀。招不如意。死則墮獄。備受衆苦。所有刀山劍樹。斬剗煎煮。抽腸拔肺。剝皮啖肉。切骨削髓。截首挑眼。焚脚燒手。諸大地獄靡不經歷。拂石塵沙。無可喻其壽命。縱彼大獄之報有盡。於百千劫復墮餓鬼。於如是劫又墮畜生。於畜生中。必殺一酬一。殺心若重。或殺一報之千萬。乃至無盡。方與相殺之人。如前相值。或殺或食。以償宿

債。錙銖無差。如其先有微善。得生人中。尚世世貧窮孤苦。多病短命。癲癇失志。盲聾瘡瘍。疥癩癰疽。膿血諸衰。百千等苦。以自莊嚴。衆怨境界。畢集其身。親族棄捨不可堪忍。此皆殺業既深。故受如是極苦也。是以梓童帝君有化書戒殺之篇。書經亦云。作惡降之百殃。不其然乎。又况異類亦有仁心理不可殺。羔羊跪乳。慈鳥返哺。有行孝之禮。胡犬護主。獅豸不屈。忠直之能。蜂蟻君臣。鴛鴦夫婦。鴈行兄弟。嬰鳴友朋。觀彼羣生與人何異。人雖至靈。反不能推同體之慈。

以及舍識更殺彼命以養一己可謂靈乎可謂仁乎。又如陸亘大夫問南泉云弟子食肉是不食是。泉云食是大夫祿不食是大夫福義亦可了。縱彼世俗延會賓客及行時祭之禮豈無蘋藻瓜果庶羞可薦之儀得全齋戒之道也譬如經說昔有屠殺之子欲求出家因不肯殺其父以刀及羊并子共閉密室謂若不殺羊當殺於汝其子因卽自殺緣是功德便生天上於多劫中受天快樂是知不殺之人旣生善處必善其身世世得長壽之報又能以德遠及子孫世代

矣然今佛法欲滅如一絲繫於九鼎多有爲佛弟子不能體佛慈悲飲啖自若見素食人反謗爲小乘爲魔頭甚至比爲牛羊爲鵝豕或謂其心太毒及百般綺語訐露其過此等惡人雖天神見而怒之謂若啖人羅刹其如世人得彼類已反謂之條直也嗚呼此佛法將滅之兆不可不知夫子產於魚尚發得其所哉之歎齊王不忍乃稱無傷仁術之言戴記殺獸有不孝之談書生救蟻中甲科之選當知殺與不殺損益昭然况我釋氏四衆方可行此殺業乎楞嚴云以

人食羊。羊死爲人。人死爲羊。汝償我命。我償汝債。以是因緣。經百千劫。常在生死。又云。生生死死。互來相啖。惡業俱生。窮未來際。法華云。佃獵漁捕。爲利殺害。販肉自活之人。皆勿親近。又有偈云。若欲殺生者。應作自身觀。自身不可殺。物命無兩般。此等誠訓。寧不昭然。或有邪見之人。謂彼衆生。但妄生妄死。罪福本空。殺之無報者。則何不道。我等亦妄求妄食。舌味本空。食之無益也。是以既有貪心。豈無報境。若云此類不食何用。則蜈蚣蛇虺。皆無用者可食之乎。以上所

述乃是審已例彼。平等不殺。仁人各行之道。若我家之子。欲修念佛三昧。正欲清淨三業。解冤釋結。生於淨土。豈可不斷殺食。於臨終時而自障乎。大藏經中。廣有教旨。諸佛一音始終不二。三教聖訓。莫不皆然。片紙之中。豈能備引。但願法界衆生。聞斯義趣。體道好生。同躋仁壽。俱盡天年。免諸冤結。更能如法化人。充聖人慈濟之道。使彼已悉證慈心。必同造於蓮華之域。成正覺矣。

勸持衆戒第十一

惑者問曰。今聞念佛直指戒殺之說。可謂指體投機。事理悉備。實善世利物之訓也。敢問爲只此殺業當極戒之爲兼盜淫妄等諸惡。悉宜淡戒之耶。若當悉戒。何以語之略也。答。噫。是何言也。子豈不聞經有具足衆戒之說。奚獨戒殺。但殺業最重通於貴賤。人所難除。故於正行之首。先令斷殺。庶可具乎衆戒。故語之詳耳。戒體豈有取捨哉。又若戒德不修。憑何立行。如器欲貯醍醐。先滌不淨。修三昧者亦復如是。必衆戒清淨乃可得成。縱其宿業深厚。不能頓斷。當亦方

便制抑。自勸自心。省身悔過。修四念處。了知世間樂少苦多。無常敗壞。不久磨滅。一切諸法皆不清淨。如夢幻無我設。諸方便而使必斷。豈可隨妄念而失其宰。又戒德雖具。若不使身心澄定。息諸世間伎能雜術。乃至一切若善若惡能分念者。設不屏去。何能一心修此三昧。三昧不一。往生何由。然今一切衆生無明業識。徧周法界。苟起一念。世心便被。如是等塵勞魔黨。牽拽將去。全身陷沒。求出無期。譬如遊魚雖逸。一絲可繫。其害非不大也。心念尚爾。况身行哉。今既

修此三昧。正欲如箭一心取的。不待此身報盡跳出
稠林。決生淨土。豈可失戒攀緣志行因循。使三昧不
成。更入惡道。可不痛傷。若果聞之不戒。則臨終無驗。
莫謂佛力無感應也。

勉起精進力第十二

精進者。不爲世間八風所退。又不爲身心異見。一切
大小病緣而怠其行。故名精進也。行人既依勸發。永
斷殺業。漸具衆戒。欲入三昧。於三昧中。或被一切強
輒二魔。內外惑亂。行有退轉者。則當堅強其志。重加

精進。如金剛幢不可摧毀。如須彌盧不可搖動。如彼
大海衆毒莫壞。假使行人聞佛記云。汝今雖修此行。
彼安養土必不得生。卽當答言。善哉世尊。我先受佛
記求生極樂。釋迦佛言。一切衆生皆當發願。願生彼
國。尚不間於女人根闕。十惡五逆阿鼻之輩。何況於
我。我今道行雖微。不造五逆。數過十念。必當得生。佛
豈自誑。肯違本願。况十方諸佛。示廣長舌相。證明斯
事。是故我今必定求生。不敢退轉也。如是名爲行人
金剛延幢勇健之力。佛記尚不能退其初志。何況天

魔惡黨人中水火盜賊強邪境界及妻妾情愛而能動我行願哉。或曰。我見世人雖修而不得生者何耶。答。蓋其見異而行不莊故也。問。如是則虛喪其功耶。答。豈虛其功。彼亦必承彌陀願力。今世不生。二世必生。二世不生。三世必生。若但一念一動歸向彼佛。必在當來多世定得往生。是名皆得不退轉者。豈有不生者乎。故知生彼國者得不退轉。修此行者亦得不退轉也。但彼後世生者。枉受多劫輪迴之苦。故須一生取決。豈可自二其志。墮在他世往生者乎。其中若

有宿業所使。願行有虧。常當一心誦此故一切輕重業障得生淨土陀羅尼。若持一遍。節減身中所有一切五逆十惡等罪。若持一十萬遍。即得不廢忘菩提心。若持二十萬遍。即感菩提芽生。若持三十萬遍。阿彌陀佛常住其頂。決生淨土。此呪世所誦者。雖出藏本。其音聲句讀多訛謬。今所傳者。乃是近代三藏法師沙羅巴所譯。比他本最爲詳要。修是行者。故宜誦之。爲正行之直指。今附錄於此。呪曰。

奈麻辣怛納特囉耶也 奈麻阿哩也 阿彌打

念佛直指

跋也 恒達哿怛也 阿囉喝帝 三迷三不達也

恒的也捷 嘘

阿彌哩帝

阿彌哩打

嘿巴

偉 阿彌哩打 三巴偉

阿彌哩打

葛哩比

阿彌哩打 薛帝

阿彌哩打

帝際

阿彌哩打

韋竭蘭帝 阿彌哩打 章竭蘭帝

哿彌你

阿彌哩打

頓

彌哩打 奇哿奈 羯哩帝葛哩

哿彌你

阿彌哩打

頓

度比 蘇哇哩 薩哩哇

阿勒捷

薩怛你

薩

哩哇 奇哩麻 吉哩舍

吉哩也

葛哩

莎喝

與奈
同音

亦名無量壽如來根本真言。誦此得大精進速生淨土

正行第十三

如上所述依正二境乃至精進。雖皆圓妙。悉是求生之方。未爲正行。此下所陳乃是正行之旨。何謂正行者。旣發此志。必使身心清淨。入於道場。先當觀察我及盡虛空界微塵刹海。一切衆生常在生死大海。歷劫不休。飄零沉溺。於六道中。無歸無救。若不令其普得解脫。何名正行。於是等觀冤親之境。卽此境上。

起大悲心。如虛空量廣大普覆。又作是念。我今此身。如彼瘡疣冤業苦聚。若不以此布施衆生等修三昧。令彼解脫。則違佛教誠。違我本願。衆生受苦甚可悲愍。我今發心。如師子王出窟。不求伴侶。不求護助。噏呻嚙吼。摧伏一切。定不爲彼弊魔惡黨之所退轉。如是大心既立。然後審彼古賢念佛正行。當擇自然寂靜之方。及非先曾穢染之地。所費先當盡已。所有乃可丐人。如法建立道場。下以香泥上懸寶蓋。中奉三身及九品像。極令嚴淨。布諸旛華供事畢備。皆令瑩

淨微妙。次則著新淨衣。燒香然燈。安設坐具。無始所有一切善根。普爲衆生回向淨土。莊嚴行願。若不如是回向。生因奚得。於是三心圓發。五體投誠。觀佛相好。胡跪合掌。乃至運心普緣無邊刹海。一切衆生及我此身。自昔至今。流浪不返。深爲可痛。涕淚悲哀。求佛垂慈。不覺此身如大山崩。歸命三寶。手擎香華。想徧法界。請佛歎德。敬禮投誠。剖腹洗腸。發露過罪。修行五悔。旋繞歸依。於是端坐面西。觀佛相好。誦經念佛。出入經行。晝夜六時。克期練行。如或障深未感。至

60 1 2 3 4 5 6 7 8 9

10 1 2 3 4 5 6 7 8 9

80 1 2 3 4 5 6 7 8 9

90

死爲期。於中不得刹那念世五欲。如是一心。若不往生。則我佛是大妄語者。故此三昧。其神若是。此三昧者。諸佛所讚。諸聖同遵。始則唱於廬山。終則流於天下。歷代傳弘。皆以此爲歸趣。但三昧儀軌雖多。惟慈雲所撰詳略得中。宜熟味之。此是第一上行境界。甚深學者。於中當竭其力。慎不可捨。此而趨彼也。若或根機不等。勝行難全。亦必處於淨室。使內外肅清。隨意立行。禮佛懺悔。日定幾陳。精進一心。誓不中悔。或專誦經。或專持呪。或但執持名號。直求往生。或能深

達法義。觀佛依正。若至得見。好相卽知。罪滅緣深。亦生彼國。如經有云。不可以少善根福德因緣。得生彼國。若有聞說阿彌陀佛。執持名號。一日二日乃至七日。一心不亂。其人命終。佛與衆聖現前接引。卽得往生。故知執持名號。卽是多善根多福德因緣也。又有未能盡斷世緣。亦修世善。於極樂國。諦信不疑。念念戀慕不忘。於前行門。隨意修習。四威儀內。以此爲歸。觸境則達彼淵源。臨事則力行方便。臨命終時。必生彼也。然此諸行。詳略雖有不同。而其法力本等。但存

60 1 2 3 4 5 6 7 8 9

10 1 2 3 4 5 6 7 8 9 80

心或有緩速。故佛應亦有遲疾。學者不可不知。又有慈雲十念法門。每於晨朝盥漱已畢。靜處面西。宜亦修行。此實往生極樂之初因。願必不可失也。如上行相義。具委明。可謂義無餘蘊矣。或曰。某於念佛之際。雖運身口。而心念紛飛。不能自制。且如何用心。得不散亂。答。能運身口之念。毋論其散。但不間不斷。自能一心。亦可卽名一心。惟行之不休。爲度固不必憂。散亂矣。譬如父母喪。愛子龍失命珠。不期心一而心自一。豈制之令一也。此心本不可制。實在行人勤怠耳。

別明客途所修三昧第十四

道場旣備。供事已陳。一一無不如儀。豈可隨時空過。則當依教。運之以觀慧。解之以妙境。承此勝心。立無作行。則生死海必枯。淨土必生矣。時有客在坐。雍容自如。端莊雅重。內蘊不怯之貌。忽作禮而問曰。今觀師誨。則知運心廣大。渙淺咸該。然皆建立道場。使供事畢備。乃安心處靜。方可起修之說也。若余生於晚輩。機鈍寡聞。自昔至今。吟咏湖海。周旋境色。或去或來。雖欲處靜進功。量力未得。若能卽於旅次。不假道

場亦可六時行道。三業無虧。誦呪持經。稱名禮懺。一如儀期生安養。一同道場功行。庶我輩可以奉行。伏願弘慈啓廸。未聞之旨。曲垂始終方便。答大哉問也。世人欲修三昧。謂必所需百事具足。然後發行。今子之志可謂拔乎其類矣。非此間不發吾之所蘊。使悉被餘機也。蓋聖人垂教。如一味雨。三草二木。各得敷榮。况念佛三昧。普攝羣機。子若求決生淨土。當知四威儀中。皆爲道用。豈特妨於客途哉。子若欲就斯立行者。最初當先立不欺心。藏德露玼。慎毋矜耀。始

從脚根下。便要內外穩當。次則必放下諸緣。休息萬事。預宜熟讀淨土經。呪五悔懺法。極令通利。又應修習所行威儀。必使端莊雅重。乃如前說起真正信心。運大悲智。普爲衆生。如理觀察。二土淨穢。苦樂兩報。實可厭忻於此發行。既在客途居處不一。如雲如水。故不必莊嚴道場。但一清淨身心。服隨分淨勝之服。於六齋日。或客何處。卽具最兩香華之供。供養三寶。表有所施。正當於三寶前拜跪稽額。立廣大願誓。不退轉。在處生世。以此爲歸。更不生中悔心。雖無道場。

莊嚴。卽於是日爲始。至形壽盡。每日六時修行此法。香燈有無。母固必矣。問。三昧旣須一心。人事則有萬緒。且如何修行。佛事世事不相妨礙。答。譬如捕鳥入籠。身雖在籠。心憶園林。兩不妨礙。籠但繫身。不能繫彼。求出之心。事但拘身。不能拘我願往之志。所謂三界如籠。此身如鳥。求出卽願往。園林乃淨土也。故知妄緣萬緒。不礙真心。何況客中。他事少惱。自不涉他身心。坦如。正好進修。問。法門次第。願更委曲。使進修之人。臨事不惑。答。日三夜三。時分不差。是其次第。今

在客中。或日初時至。若有像處。或自有像隨身。則當口誦身禮。或默誦身禮。對像而修。如無佛像。或對經卷。或但面西遙禮。或但除東向。隨方修禮。當具如道場儀式。若有時在道。登舟及不得已。一切治身動用之事。不可擗置。則佛事世事同運也。又當念此世務。本爲養身。我身行道功亦不棄。卽與三昧同體也。問。我聞心無二用。得一失一。如何二事同運。答。子豈不聞籠鳥之喻。已自委明。又如一心。不妨眼見耳聞。身作心憶。應用無盡。何止二事。用旣無盡。則當就彼一

切動用之中。一心持誦小阿彌陀經一卷或上品。或楞嚴勢至章。及誦淨土呪或三或七至百多徧。又稱佛號或三百五百至千及不計數。爲入懺佛事。回向已方入懺其禮懺儀式。具出慈雲懺儀從一切恭敬文禮三寶。運香歎佛禮拜。懺悔至於旋繞歸依。皆當隨其文義節段。一一想我此身恭對淨土佛前。或此道場形像佛前跪拜瞻繞。一一明了。不使昏亂。禮畢觀佛及白毫相等量時而止。於是如前念誦經呪佛號回向畢。方爲初日分佛事。以此想禮與道場行法。

一同。但加身禮爲異耳。又其所誦之音雖隨人境好惡而輕重之。當令聲默相半。沉大雅重俾兩肩之人隱聞。切不可與人多語。又當於未作務前或先於佛前燒香一炷。或更不能但隨手拈物爲香就先散之。至時但運想耳。於餘時惟宜獨坐獨行遠離喧雜。及聚首閒談戲謔。侮弄哂笑歌歎吟詠筆硯使人忘失正念等事。是爲日初分佛事。其日中分後分與夜三分亦然。是爲六時行法。念彼夜中人定境寂。用功正宜與日不同。行者既爲生死事大。豈可隨於懈怠而

60 1 2 3 4 5 6 7 8 9

10

80

1

2

3

4

5

6

7

8

9

恣睡眠。縱歷寒暑之極。慎勿脫衣法服數珠。宜置近處。手中淨水不離坐隅。或有所需。皆應預備。又應觀彼信根厚薄。不惱他人。不使人厭。於此無礙。則當微出其聲。如琴如瑟。細而沉重。大而不雌。使天神歡喜。降護鬼畜。聞聲解脫。則其功彌深。或在船中。及在他家卑隈之處。皆當察境察人。一心精進。方便宛轉。以竭其行。切不可於中起人之過。彰人之惡。又不可盡人之歡。傾人之美。縱遇時間處。便或有他事異人爲疑者。亦當擇於僻處。端坐面西。合掌至膺。聲嘿隨宜。

如前想禮與作務不異。又若於作務之時。事訖。身閒。不拘其懶多少。乃至一句一拜未圓。卽當連音隨誦。至彼佛前。身體圓滿。若於佛前端禮之時。忽有他事急爲。亦不拘懶多少。乃至一句一拜未圓。卽當隨所作處。想禮圓滿。切不可入懶。未多而重起懶。又此客中想禮。蓋出乎不得已者。不可暇時。亦以想禮而怠其身。又不可以此想禮。加於作務之時。而於閒時反虛擲也。於淺信人。不可遽然勸修。於深信人。又不可不密啓之。使其自肯。又不可使化功歸已。如春育物。

不見其功。彼依道場所修者名順中易行。從客中而修者名逆中易行。若以逆中易行比之於順中易行。不啻若天地之懸遠矣。逆中易行其功益著。問此想禮與身禮同否。答同。子豆不聞三業者。意爲身口之主。王既注想焉。得不及乎身口也。又如懺中運念香華。及此身心徧至之旨。豈不亦但想念也。例此可知。問若爾。但心想禮可不運身口耶。答意業雖勝。若全身口。名三業圓修也。其默誦之義例此可知。又能以此想禮之數。於空時填禮。其行尤壯。問六時行法之。

外如何用心。答或觀佛相好持呪誦經稱名頂禮等行。念念不捨。克期往生。如行路人。步緊到速。步緩到遲。當如是用心也。若人身心力弱。不能具修六時行法。但克定經懺之日。每日或三五時。雖不厭乎加多。亦不可一時增減而改其所立之行也。問客中三昧之說。圓融次第。於世罕聞。若爾。則依道場所修者爲不必耶。答如人墮海求船未得。忽遇橫木。且執之得達岸也。豈可無船。又棄其木而自喪哉。况又客中去住。隨主厭忻得無差礙。可不進功。如上是爲客途所

60 1 2 3 4 5 6 7 8 9

80

1 2 3 4 5 6 7 8 9

修三昧。此三昧者。境界甚深。功能廣大。合佛妙心。稱揚莫盡。四三昧中。名非行。非坐。三昧。亦名隨順。四威儀三昧。正被大機。小智小根。隨分受益。以此三昧。比於道場。或缺身禮。餘儀亦同。子當以此三昧。精進受持。一志西馳。切不可因循而更滯於生死也。如上自爲正行。余又觀今世之人。或有志於斯道者。纔聞其易。卽作易想。便妄謂得證。纔聞其難。卽生退屈。便盡失其志。縱有信心頗切者。又流入邪見。叢裏密相傳授。以悞多人。其傳授之法。千形萬狀。至有不可聞者。

皆能羅罩人心。使其自肯。非行漸張。師徒俱陷。豈能若爾。正心下問之切也。客作禮曰。某崎嶇於客中久矣。每想生死無常。欲修未得。但慮口體之養於法行道場。不得起修爲恨。今宿生緣。幸得聞此說。可謂如甘露灌頂。徹骨清涼。敢謂決志受持。始從今日。如冤爲親。更無餘恨。從是身心放下。如息重擔。自在坦然。願世世生生。頂戴受持。寧斷命根。誓不退失。普使一切法門。皆悉了知。在處在客。於逆順中。不礙道用。同成三昧。可謂羣生之大幸。可謂學佛者之大幸也。此

既可修。則知一切奔馳世務。流蕩四方。勞生販賣。邸
店市廓。商賈負道。百工伎藝。男女老幼。奴婢黃門。受
人驅役。不自在者。於彼一切行住坐臥。著衣喫飯。語
默動靜。及被牢獄者。於喜怒哀樂之間。未有不可修
時。况出家四衆。在家四民。有居可處。有暇可修。所欲
皆具。得自在者。寧不進其行也。客又曰。今有聞極樂
過十萬億佛土之遙。而望途怯遠。聞生者多是一生
補處。而恥躬弗逮者。云何答曰。彼等豈知如上所說
十方空界。悉是我心。心淨則十萬非遙。心垢則日躉

猶遠。但期心淨。何算程途。如少頃睡眠。夢行千里。豈
以常時爲比較哉。理既有土。可生劫不可謂但能心
淨。卽是更不須生於彼土也。乃復禮曰。唯。敬受來教。
又曰。某初聞是說。先所未聞。謂師但隨自意以垂其
言。今聞三昧之名。乃知來自聖典。實應機宜。如青天
白日。可謂後學之誠訓也。豈是爲我曲說哉。願筆記
之。永爲將來之訓。更求垂示道場。所修始終微細正
行法門。普利斯世。明其幸尤大。余曰。善哉。當盡子意
而與彼說之。客乃謙恭而退。其客名行一。字志西。自

言曾讀智覺禪師萬善同歸集甚熟。後遊廬山見始祖遠公遺跡。因發願念佛云。

三昧儀式第十五

念佛法門嚴建道場之事。并供養儀式。及預治衣服鞋履。更衣沐浴。門頰出入。方便正修。禪誦懺禮等。清淨法則。具如慈雲尊者懺儀等文。此不再具。如所期日至當於七日之前。營理庶事俱畢。必先使身心靜定。期於懺內障盡。行圓又起首必六齋日。又期日之前或三日或七日。佛前香華淨水等供。不宜不謹。蓋

有佛天先降森嚴此處。辟除魔事穢惡等障。使行人於道場中三昧成就。故於此道場當作淨土想。作解脫處想。作寶所想。作定得往生想。無輕視之。又當返觀世間無窮之苦。如得避免。永不再入。又不可將平日難割捨事蘊之於心。存其餘念。與正懺時作障。便勝行不進。虛喪其功。恐難再會。儀云。不得剝邢念世五欲。

行者十人已還多則不許。須預審擇其人可不可。觀彼平日行止無大麤過。或信根淳厚。離諸奢暴。音聲和

60 1 2 3 4 5 6 7 8 9

10

80

1

2

3

4

5

6

7

8

9

雅儀軌端莊。受人約束爲生死故。不生悔惱。肯存謙下。可作同修。若無是人。止四三人亦善。或一已尤妙。不可失察。反使敗壞軌則。惱亂清修。又於衆中。宜推尊一人。德重行熟者。或別請久爲師範者。作方等道場之主。主行懺事。使一衆觀其儀禮。聽其舉揚。作大依止於中。或時示現逆順之相。毋見過失。其人亦可審已。謙辭或赴或止。

其禮誦儀式。或拜或跪或坐或立。又手合掌恭敬旋繞。皆當一一端莊雅重。收視隔聽。攝境歸心。未達者。

當問先覺。慎勿自恃其力。使身心搖動。或欹或倚。衆雖預集。當於隔宿之前。沐浴盥漱。換服履等。使道具如儀。懺首鳴引磬。領衆入道場。除內護二人外。餘不許同入。各周旋燒香了。依修懺位。朝佛三禮。以祈感降。禮畢。環繞立定。主懺出衆白文一篇。讚佛讚水。乞祈三寶加護證明。俾於正修之時。無魔無障。必生淨土。禱畢。就舉過去正法明讚。念大悲呪七徧。如意輪呪七徧。毘盧灌頂呪七徧。主懺候舉呪之時。即以手執水盂。於香爐上。請熏約半卷許。方傳與右邊之。

60 1 2 3 4 5 6 7 8 9

10

80

1

2

3

4

5

6

7

8

9

人。次砂。次香。次華。亦然。如是右旋。展轉三匝。三呪畢。復舉大悲呪。周圍灑淨。及各處欲經過所。先明燈已。當最前挑燈照路。次則執盂灑水。次捧盤撒砂。次提鑪行香。後隨處散華。領衆從佛座後轉。先於道場內右繞。熏灑圓滿三匝。使砂水邊皆徧。次從道場外。及施生處所。到禪悅堂亦繞轉一匝。淨厨。次東淨浴室。脫著處。晏息處。閒處及要路。凡行人及經過處。或繞彼屋。皆當熏灑一匝。是故以灑爲界。名爲結界。經云。界如金剛城牆。蓋遵此義。又撒沙者。換土淨地。結

地界也。灑水者。卽去垢鎮彊。結方隅界也。行番者。使香雲如懸蓋於空。結虛空界也。散華者。顯瑩結鮮明莊嚴法界也。如上一切法用。悉是我大悲聖主及神呪力加持。故砂水到處爲佛寶土。以是因緣。邪魔不能入。外道不能壞。而我三昧可成也。又此界相慎。不可破。若破此界。便爲不祥。必使一衆道行難成。多障何謂界相。界相有二。有內。有外。內界相者。卽修懺道場四方際畔是也。外界相者。卽屋際外八方。砂水到處是也。內人出至外界裏必止。越外界爲破界。外人

入至內界外必止。越內界名破界。或辦事人以手指及衣裾入內界簾幕內一分許亦爲破界。或葷穢惡人入外界片時亦爲破界。破界之兆不吉可知。若如經旨則當重建道場再行懺悔乃能遠破界之相也。行人可不畏哉。

其有身心之力不及於此法行不能具修。若欲但修五時者當止日中時。欲修四時者又止夜中時。欲修三時者又再止日後時。若欲但修二時者惟在早晚之間也。又行雖隨意而立。立定之後不許改易。但可

增修不可退減縱有病綠官事亦當想念豈可隨或勤怠或興或廢朝立暮改使其正行不純一也。今欲修此道者必先取彼念佛法則及淨土經懺呪等前後排布如意多少安頓諦當再三審實我能力行不譬如有人浮身渡水察水遠近不致疲絕而乃渡之行人亦爾觀自勤怠觀法廣略而乃取之不當趣一時之勇而立卽時而廢又不可別有誦持心不專注。如人發箭心一則中念佛法門亦復如是。若能行純心一應念得生遊戲極樂於一念中所獲功德豈易量

60 1 2 3 4 5 6 7 8 9

10

80

1

2

3

4

5

6

7

8

9

哉

揚佛下化之力第十六

已上所述種種方便皆是衆生起心進行上求之心。而不知我世尊下化願力種種方便無所不至過於衆生上求之心百千萬倍不得爲喻如經所謂阿彌陀佛慈悲光明徧照法界普覆衆生作大救護。不令墮墮阿彌陀佛慈悲願力徧周法界普接衆生作大攝受不令漏失。阿彌陀佛陰入界身徧同法界普示衆生令彼了悟不令退轉是故十方世界一切衆生

皆我彌陀願力所持猶彼慈母愛惜嬰兒懷抱乳哺不令失念父母愛兒但止一世報盡則休佛念衆生世世不捨以是義故能於我佛大願之中一稱其名滅八十億劫生死重罪信有旨矣蓋我彌陀願力常在世間救苦衆生衆生能念豈不速應譬彼母救嬰兒水火之難何待兒求兒若能求母必倍愛惟彼歷劫逃逝自甘退失不受救者誠難救焉縱有五逆具造十惡滿心毀謗妄語虛誑說法無罪不造臨命終時應墮阿鼻其相已現必入地獄之人若能遇善知

識教令念佛。此人苦逼。一念改悔能十稱其名者。尚能變地獄之相爲淨土而得往生。若能以是觀行莊嚴及能先排所造之業者。豈不克應。喻昔有人。懼虎上樹。因失聲故。稱南無佛三字。後值釋迦得道。况彼命終苦逼。猛勵十念而不感彰。問我聞彌陀願力。逼一切處。今觀此說。但能救彼將入地獄。及未命終之人。其已入者似不能救。如不能救。則知彌陀及諸佛願力。有不偏之處耶。答子。豈不聞諸法所生惟心。所現一切因果世界。微塵因心成體。若知諸法尚不離。

於衆生之心。豈離彌陀本體而願力有不偏處耶。問若爾。如何地獄之人長劫受苦。未聞有能救護者。答子。又當觀今之市廓屠肆之內。聚生而殺。日夜不休。未聞有能止其殺者。殺因既不能止。獄報亦無能救。然則殺在彼而報在我。但因果難逃耳。豈彌陀願力不偏。而地獄無救護者耶。譬如有人。頗知經義。合佛妙心。而於身三口四等惡承宿習故。不能滅除。因不滅。故其人命終之時。不遇善友。提獎念佛。直入地獄。於地獄中。受無量苦。雖受諸苦。善因不滅。於諸苦事。

皆能照察觸境知心既知是心亦知生佛一體以一
體故卽知正是如來微妙清淨之身由能覺了生佛
一故則當其人正受苦時悉如夢事了彼苦相卽是
菩提此心淳熟無錯謬故又能促彼多劫地獄極苦
之報一時輕受其人於是雖受衆苦得無苦相反起
代受苦心是以不求出離以此妙解合佛心故彼昔
所曾供養之佛乃至曾於名像所歸敬佛及經卷中
所信解佛或念彌陀機感相投之佛彼佛則必如我
解境還現如是廣大如虛空量威德熾盛光明之佛

相好神通巍巍赫奕至彼地獄最上之頂垂肩彈指
慈音告勅於其支體放大光明其音隨光直至地獄
淵源之底其獄所有鐵城鐵門鐵網銅柱乃至刀山
劍樹鎧湯鑪炭一切苦具承光照者無不摧碎灰滅
如影如風了無踪跡又彼一切牛頭馬面鬼吏獄卒
銅狗鐵鷹鐵蛇鐵嘴諸蟲鳥等承光照故如菩薩相
慈視愛念其受苦人及同獄苦囚忽得本心增益善
念見彼光明又聞告勅如深井底仰望雲漢舉眼上
視見佛勝身躊躇歡喜頭面頂禮悔過自責與同苦

60 1 2 3 4 5 6 7 8 9

10

80

1

2

3

4

5

6

7

8

9

者發菩提心。隨光直上至佛所已。摩頂授記。接足作禮。聽佛說法。應念悟道。卽能飛行遊戲神通。淨佛國土。同佛生處。如大菩薩成無上道。教化衆生。難可窮極。問若從因果。則此佛光但照勝解之人出獄。衆因無與。如何一時同出答。譬如有一惡逆之人。懼於官禍。入獄之時。由彼一惡爲因。衆過俱生。則必展轉累乎妻子父母親戚知識人等。同受苦果。其善行人出獄之時。亦復如是。豈不亦令同受苦者。展轉生善。悉承佛力。皆生樂處。若此。則我彌陀願力實徧一切時。

處。豈特不能救護已入地獄衆生耶。若謂獄報未盡先欲使之令出。獄因無善而欲佛光下照。其可得乎。更能以彼省已。奚不自悔。問若待獄報盡時。佛光來照。我必報盡。自由何須佛光照耶。答。若非佛光報盡。雖出於三惡道。未知何生。則必各自重至微。展轉歷於多劫。多無量劫。不思議劫。方至人中。猶自貧窮下賤。瘡殘百疾。受諸大苦。又因求不得苦。惡念轉甚。若無微善。還墮地獄。如盲入棘林。何由能脫也。若承佛光下照。威力則能轉重輕。受轉長短。受轉多少受。

60 1 2 3 4 5 6 7 8 9

10

80

1

2

3

4

5

6

7

8

9

又能一出地獄便生佛土。豈可言不須佛光照耶。若作此見得大重罪。經云。假使大千世界滿中大火。念彼佛者直過無疑。何況一已之火而不可滅。卽此義也。又云。彌陀如來悲心激切。乃至於無間獄大火輪中。代諸衆生受諸苦惱。方便救脫令生安養。况未淪墮之人而不救護。又云。彼佛慈力普覆世間。一切衆生。於彼佛身刀斫香塗。以慈力故。不二攝受。是故彌陀願力。下化衆生激切之心。於茲可見。何況以種種形。身同衆生。於諸時處作化事者。實難可測。若不諦

信。未可謂知法者。或謂衆生全體是佛。未審誰是能救所救者。余只向他道。汝欠悟在。

十大礙行第十七

詳夫一心平等體性無礙。衆生雖纏綿於業識之中。靡不有出塵之志。方欲究道。魔境先彰。一事虧心。萬善俱失。成小敗廣得者還稀。况乎物欲交傾。死生遷變。遞相倣效易地皆然。使我如來於三大阿僧祇劫。捨無數頭目髓腦國城妻子。身肉手足。戒忍精進。承事知識。不惜身命修行道品所得法門。因茲障礙退

其心故。一旦在我而滅。可不痛傷。我今旣爲釋迦之子。不以力爭。坐令法界羣有永失慧目。甚於割切身肉也。是故我今依經創立十種大礙之行。名十不求。行人雖不故願於礙。但於此間。或不得已。有一切障礙。現前之時。俾我身心先居礙中。而衆魔諸惡障礙之境。不能侵我。不能障我。譬如金火同爐。火雖欺金。金必成器。其十種大礙之行。今當說。一念身不求無病。二處世不求無難。三究心不求無障。四立行不求無魔。五謀事不求易成。六交情不求益我。七於人不

求順適。八施德不求望報。九見利不求霑分。十被抑不求申明。此十種大礙之行。攝一切諸礙。惟上智者堪任。中下之人。不敢希冀。若有得聞此十句義。於諸礙中。一一皆能照察覺悟。省身體道。持之不失。則能入諸魔界。不爲羣魔退轉其心。循諸色聲。不爲色聲惑亂其志。乃至憎愛利名之境。人我得失之場。我心先居礙中。彼礙豈能爲礙。礙若無礙。則於道行尚可直進。何況得於自然無礙之境道。豈不可進哉。譬如高崖之木。雖久旱如焚。尚不改其秀色。何況雨澤滂

需而又加於三春之令。豈不敷榮茂實者乎。又如根
缺之人。運用雖艱。而於求食之計。有不勝之巧。若以
求得之計。移之於求道。豈在礙不能行道乎。當知此
礙。即是一切衆生大善知識。亦是一切衆生良佑福
田。可以了死脫生。可以超凡入聖。於諸世間所有美
味上服。全剛珠玉。一切衆寶所不能及。是故若非以
礙爲通。則於非礙反成爲礙。何以故。身無病。則貪欲
乃生。世無難。則驕奢必起。心無障。則所學躐等。行無
魔。則誓願不堅。事易成。則志成輕慢。情益我。則虧失

道義。人順適。則內必自矜。德望報。則意有所圖。利害
分。則癡心必動。抑申明。則人我未忘。以是義故。則知
十無礙道能生是過。及成如是一切不吉祥事。爲障
道因緣。何以故。貪欲生。必破戒退道。驕奢起。必欺壓
一切。學躐等。必未得。謂得願不堅。必未證。謂證志輕
慢。必稱我有能。虧道義。必見人之非。內自矜。必執我
之是。意有圖。必孳名。欲揚。癡心動。必惡利。毀已。存人
我。必怨恨。滋生。是十種過從。凡妄生。皆名邪見。展轉
生。起無量惡法。徧虛空界。必令衆生墮於地獄。豈可

60 1 2 3 4 5 6 7 8 9

80

1 2 3 4 5 6 7 8 9

於此不生敬慎。若能體茲礙境識病因緣。知病性空。病不能惱。了難境界。體難本妄難亦奚傷。解障無根。卽障自寂。障不爲礙。達魔妄有。究魔無根。魔何能燒。量事從心。成事隨業。事不由能。察情有因於情難彈。情乃依緣。悟人處世。觀人妄爲人。但酬報。明德無性。照德非常德。亦非實。世利本空。欲利生惱。利莫妄求。受抑能忍。忍抑爲謙抑。何傷我。是故大聖化人。以病苦爲良藥。以患難爲解脫。以障礙爲逍遙。以羣魔爲法侶。以事難爲安樂。以弊交爲資糧。以逆人爲園林。

以市德爲棄屣。以疎利爲富貴。以受抑爲行門。如是則居礙反通。求通反礙。於此障礙。皆成妙境。故得之與失。自不能知。人奚於中。强生取捨。是以如來於障礙中。得菩提道。至若爲半偈時之遇羅刹。作仙人世之值歌利。瓦石來擊之。增上慢比丘。木盂爲孕之大毀謗嬖女。及鷲屈摩羅之輩。提婆達多之徒。皆來作逆。而佛悉與其記。化令成佛。豈不以彼逆而爲吾之順。以彼毀而爲吾之成也。何況時薄世惡。人事異常。於學道人。豈無障礙。於今若不先居於礙。則障礙至

60 1 2 3 4 5 6 7 8 9

80

9

時莫能排遣。使法王大寶因茲而失。可不惜諸。愚故依經聊述所知。願勿嫌棄。倘因聞此義。故障礙現前。反能勇進於道。可謂得斯旨焉。

羅顯衆義第十八

夫念佛三昧者。名一行三昧也。蓋彼行人。既了漢旨。能持一心。惟念彼土。惟憶彼佛。知身土無二。了憶念亦一。乃得名爲一行也。雖名一行。亦當以彼一切世出世間無量法門諸功德行。以爲助道。則往生行疾。是故一切諸行。悉爲淨土而修。無別岐路。名一行耳。

譬如衆流入海。同得海名。萬善同歸。得名一行。以是義故。則一切念處正勤。根力覺道。四弘六度。皆淨土行。乃至彈指之善。及散心念佛。或一稱名。或舉一手。一禮一讚。或一瞻仰。乃至或奉一香一水。一華一燈。一供養具。或一念修習。至於十念。或發一施。一戒。一忍。禪定智慧。一切善根。回向極樂。願力持故。雖有遲疾。皆得往生。如經所說喻。昔有人以小滴水寄於大海。願不壞不失。不異不竭。雖經多劫。要還元水。其人經多劫已。如寄所取。果得元水。不壞不竭。此亦如是。

60 1 2 3 4 5 6 7 8 9

80

1 2 3 4 5 6 7 8 9

以小善根。回向極樂。如寄滴水。雖經異生。善根不失。亦不壞竭。生彼無疑。是以大乘小乘。有漏無漏。散心定善事想。觀慧皆名一行。悉得往生。惟除外道種性。故云。但辦肯心。必不相瞞。又經所謂一稱南無佛。皆已成佛道。良可深信。其有因心未起。善行未立。身心未届先期。感應者不可與其同語也。是故釋迦聖主一代至談。有無量三昧。無量解脫。無量行願。總持相應。無量法門。惟念佛一門。圓攝無外。悉皆具足。如彼大海。吞納衆流。性無增減。如意珠置高幢上。能滿

一切衆生願求。體無虧損。此三昧寶王。能攝能具。亦復如是。由是義故。始我世尊以此三昧。徧告衆會。非不再三。彼會所有承聽大根之士。若文殊等及三乘聖賢。天龍八部。無不傾心而歸信也。逮法流東土。有大至人。於彼廬山闡揚遺化。彼信奉者。如風行草上。極天下之望。無不美其教焉。自佛至今。將二千三百餘載。中有聖賢之人。高僧巨儒。農商仕賈。匹夫匹婦。奴婢黃門。或自行而勸人。或著文而作誓。重法如寶。輕身若塵。臨難不懼。臨死不顧。挺身立行。力修此道。

60 1 2 3 4 5 6 7 8 9

10

80

90

100

者。何知其幾。或修隨喜。或信歸依。乃至隨得盡已之誠而行者。其數益衆。誠所謂列宿塵沙。莫况其多也。或有半信不信。猶豫不決之人。尚生彼國疑城邊地。何況正信行者哉。傳記所載萬不及一。自古及今。咸受其賜。豈筆舌所能盡述。縱欲別修道品。但假自心之力。或有退轉着魔之患。惟此法門。因仗佛力。修則必成。無復魔業。永不退轉。又此三昧。非但遠魔。亦於人間一切縣官戶舌。是非患難。水火盜賊。惡人凶事。乃至一切虎狼蟲獸。鬼魅妖精。不吉祥事。不能侵害。

又亦不爲一切疫病。傷寒癰疥。下瞼眼耳鼻舌諸病所惱。如其願行無虧。皆能排遣。惟於人中名聞利養。甜愛軟賊及嗔心嗔火。雖有佛力。蓋是自咎不能救焉。行人當深加精進以攘却之。若一念因循。必爲所奪。然彼軟魔。但能害淺信貪怠失念之人。其精進者。如剛火得水反堅焉。敢小近而睥睨也。是故行人。因佛捍魔。非止此身安樂。又得三昧成就。天人護助。臨終正念往生。其往生之際。瑞應非一。或天樂盈空。或異香滿室。或光明照體。或寶座現前。或彌陀垂臂。親

60 1 2 3 4 5 6 7 8 9

80 1 2 3 4 5 6 7 8 9

自來迎。或菩薩執臺授手而接。乃至預知時至。正念不謬。諸障忽空。自能沐浴加趺。會衆說法。叉手告別。或更勉人進道。書偈擲筆合掌而逝。或臨終之後。舉體如生。齒骨數珠燒之不壞。光燄異常。五色鮮明。祥物於空盤旋不散。煙所至處。舍利流珠。觸物而生。此耳目之所常有者也。若非平日履踐明白。精進力感。焉能若是。嗟今之人。或有修而無効者。蓋彼信根淺薄。因地不真。未曾立行。先欲人知。內則自矜。外欲顯曜。使人恭敬供養。冀有所得。甚至妄言得見淨境。或

見小境及夢中善相。未識是非。先欲明說。此等甲下必爲如上魔侶所惑。願行退失。還隨生死苦趣。可不慎哉。雖有道場持誦懺願儀式。不得不被人知。蓋出於不得已。豈可特露其迹。使觀行傾敗哉。是則行人還當審諳。密實自行。內懷慚愧。勿露其德。至到家時。不被如上強軟二魔所惑。可也。中有宿障欲滅。微見好相。如其不能蘊德。聞人之耳。則其行必覆。所以遠公三觀聖相。平日未嘗言也。但除臨終時耳。至禱至禱。又此三昧體性雖圓。所解則宜廣大。所行則宜遠

諸微細條章。革諸猥弊。乃至小罪。猶懷大懼。又當解隨大乘。行依小學。乃能合此三昧。若知小不小小。隨解圓圓。不離小小。卽是大小大解行。一理無分。卽超世見。經云。孝養父母。奉事師長。慈心不殺。修十善業。受持三歸。具足衆戒。不犯威儀。發菩提心。漢信因果。不謗大乘。勸進行者。以上每句是一法行。古人各有法訓一章。茲不能述。又復當護人心。勿使誇嫌。動用自若。誦大乘經解第一義。親近善友。請問先覺。不執已見。不引已長。志存忍辱。行當依經。聽聞正法。不

毀僧尼。息世雜善。不貪名利。遠離邪惡。處事必忠。將過歸已。漢誠綺語。一心不亂。視人如佛。捐棄伎能。惟求往生。身必清淨。如是等無量善行。悉宜修習。能助正道。更能割世染心。於憎愛二境。無諸畱難。凝心如一。必生淨土。其功甚大。不可盡述。是故於此法中。密修斯行。高而不名。得生彼者。何知其幾。然而有名於傳記之人。如大海之滴耳。豈可量其數哉。若人能依教誡。但行此行。尚能利益無量冤業衆生。何況父母師長。法門眷屬。兄弟姊妹。及平日中解我患難。提挈

我者不得其利。故知但修此行恩無不報。是以應當一心念佛。阿彌陀佛及二大士境界甚深。於苦海中難得親近。難得憶念。何以故。能憶念者必解脫。故聞名尚難。何況親近。經云。若善男子善女人。但聞佛名。二菩薩名。除無量劫生死之罪。何況憶念。若念佛者。當知此人是人中芬陀利華。觀世音菩薩大勢至菩薩爲其勝友。當坐道場。生諸佛家。是故十方如來示大舌輪。殷勤勸勵。娑婆教主告誡叮嚀。其辭激切。俾令五濁衆生。必修此道。乃得度世。何以故。蓋彼五濁

衆生身心俱苦。以苦爲命。猶水火聚而佛特於苦處行悲最深。正應機宜。如水如月。感應道交故也。是故世尊自成正覺。至入涅槃。其音不二。於法說中。始從華嚴會上。終極法華道場。玉音布告。稱述何窮。彼會所有大心勝志之士。承順慈旨。悉皆起願而求生也。何況我等末世鈍機流浪者哉。有識之流。須銘肌骨。自是彌陀願力不斷。代不乏人。聖人以此唱之於前。賢者以此繼之於後。廓然徧乎十方三世。何止天下。霈然充乎六道四生矣。但人倫天神嚮化。鬼物順之。

60 1 2 3 4 5 6 7 8 9

10

80

1

2

3

4

5

6

7

8

9

若人非人。無不讚仰。載諸行事。具諸典章。盈溢乎海藏龍宮。徧布乎人間天上。深根固蒂。悉應羣機。蓋皆我彌陀願力致然也。佛言。最後惡世。我法滅時。惟此教典。多留百年。以度羣有。然則此法。豈非我等殷後之至訓也。彼飛禽名八八鶴鵠者。墮在愚癡妄想異類之中。以能隨人稱名。亦承三昧力故。尚于埋處生蓮。何況於人人。而不如可謂不知愧矣。余生於末世。正值後五百歲。故人根淺薄。疑惑不信。又復異見邪解。各執不同。遞相誘掖。使彼正行之人。多被惑亂。傷

感盈懷。是故集彼禪教淨土諸文。及諸經卷。取其極深至要之義。述作此說。類以成編。流布世間。斥邪顯正。普願法界衆。生於此說中。一見開解。了悟真心。知彌陀依正還在西方。達西方依正。不離本性。但含識者。皆同往生。悉深入其階位也。更願先覺不憚慈悲。見未悟人。如法教導。前人若昧可與隨根應病剖析幽微。更爲宣說。彼若一念信解。行願必成。往生可期。功莫稱述。縱有異執。牢固信樂不深。但一句染神。亦成緣種。展轉利益。無盡無窮。勸發之功。非不大矣。若

人果能如是不師於心不欺不妄隨此正教誨人不倦者縱自不行卽爲已行縱自未學卽爲已學何以故法界一相無自他故如昔有人自於一生未曾修行但能二次悉傾已有平等一心建會勸人同念佛故命終之時亦得往生其事昭著故知能發慈悲之心示攝受之相及能利彼勸人念者所得弘多誠爲無上法王所使但不可執已謂定不必修耳是故三昧甚深法門如海顯利之事豈能盡言聊記所聞爲世勸發

獨示一願四義之門第十九

或有問曰念佛勸發之書吾於古人見之多矣雖唱和相尋言有同異而義豈有異哉若此集者除述依正明觀慧分折攝顯衆義等餘如斥妄顯真之類余若未之聞也雖古之至人尚未肯盡如有所待况某於此而敢輕視哉余雖不能入直指之道而亦獲新聞之益敢問何謂而作答曰噫余傷世之不軌道也而悉逐塊陷邪故爲之說豈余之好辨哉蓋出乎不得已也又問此三昧說旣詳且明或謂難至還可

60 1 2 3 4 5 6 7 8 9

80

1 2 3 4 5 6 7 8 9

以一句而盡其義乎。答。何必一句。亦可以一言而盡。何謂一言。所謂願也。何謂一句。所謂戒解行向也。然此一部之義不出戒解行向一句。戒解行向一句必從願起。乃可以一言盡也。或廣或略。卷舒自由。豈復滯於一隅者哉。何謂爲戒。行人旣修三昧。若不持戒。雖有信心爲彼世間惡緣雜染相侵。相奪。塵勞難遣。毀壞法身。令解入邪。不得往生。經云。若一日夜持沙彌戒。持具足戒。卽得往生。故必當持戒也。何謂爲解。行人修此三昧。求生極樂。若不以此深慧妙解。知淨

穢兩土東西敵立。真實不謬。又知自此淨穢兩土全具我心。不離當念。從何法修可得生彼。經云。讀誦大乘解第一義。乃得往生。故必當正解也。何謂爲行人。求生淨土慧解旣正。則必依解立行。六時行道。三業無虧。直進不退。決期生彼。經云。修行六念。迴向發願。一日乃至七日。卽得往生。故必當立行也。何謂爲向行人。欲必往生。於如是戒解行等所生功德及今一切時處。與無始來大小善根。一回向淨土。臨終乃得決生。經云。回向願求生極樂國。譬如辦事於家。

60 1 2 3 4 5 6 7 8 9

1 2 3 4 5 6 7 8 9

歸家得用。故必當發廻向也。此四大法門一句之義能攝一切善法。譬如四時成實穀果。各得其要。失一不成。此四法門亦復如是。若失其一。三昧不成。是故須當四義具修。乃滿一願也。問。只此一句。還成多句答。多句卽一句。一句卽多句。多句一句。攝義皆盡。不可謂多句義詳而一句義闕也。問。若是何不但說一句。答。多句廣說。一句略言。廣略雖殊。蓋各爲其機。皆能顯道。豈可但一句說而廢廣說也。又問。彼三家村裏匹夫匹婦行公行婆東西不辨菽麥不分。此持戒

等一言四義懵然無知。或惟一心稱名。或但專勤禮拜。而得往生。臨終徵驗昭著。何也。答。此一心中。何法不具。旣從慧解信有二土發行。稱名回向求生。豈更破乎佛戒。如是四義旣具。諸行不立而成。遂得往生。成其初願。豈可名爲菽麥東西不分不辨者哉。問。若爾行者。但當一心諸行自具。更不必立四義等也。答。若先知四義而一心者。如以基地堅牢。故則永無退轉。若先一心而具四義者。雖得往生。於中忽遇魔惡邪黨。則多有退轉。是知還以四義爲優也。繼時問衆。

60 1 2 3 4 5 6 7 8 9

10

80

1

2

3

4

5

6

7

8

9

卷之二十一
將散忽有承上問意復作問曰我聞淨土勸修之書自古及今作者多矣其辭義純善悉應機宜將偏於人間世又依教得生者已廣可謂義無餘蘊矣云何於今更有所作使學者有異解耶今詳此集義若述古古人已明不須更說義若別立今人莫解恐成臆見若不出二句而說不知爲名耶爲利耶願聞其要答噫陋矣子之難誨難明也吾聞古人立言必祖佛經旣祖佛經雖一句義假使大千世界塵數衆生皆如普賢經切而談理趣猶尚不盡豈古人已說今人

不可言哉豈先佛已說古人不可言哉不知今人不述古人之言古人之言行不顯古人不垂今人之誠今人之志慮無憑又義雖述古意趣不重語雖別立理不異古但以世去人逝所解異端雖決甲疑復增乙病乙病旣復丙疾又生展轉多岐流於歧見又彼聖賢之書雖則山高海積泯滅者多後學機遲卒難尋究是故於彼廣文中摘其精萃簡要之義急欲解當世之惑集以成帙盡壬癸之沉疴豈爲利名乎哉子之所問慚且愧矣譬如大海添流海豈厭其深廣

巍山加土。山笑惡其崇高。又今人之疑古所未聞。古人之偏。今人莫至。去聖既遠。故當依經辨明。今人之疑也。又如滿室並金之藥雖貴。若不診其疾而擇其對者用之。非但疾之弗瘳。命亦難保。又經中一義。萬解萬明。何厭乎言之再聞。何憚乎言之未聞也。子當以此三昧披究詳明。立大願行。直進於道。求生淨土。慎母更待臨行決別之際。愛境惜身。如生龜脫殼。萬苦攢心而自悔焉。

示念佛滅罪義門第二十

有客問曰。念佛三昧直指。始於極樂依正之境。終則求生行願之門。無不畢備。但經有稱佛一聲能滅八十億劫生死重罪之句。某於此語不能無惑。若果有此理。今觀世人若貴若賤。於盡生中。未有不一稱其名者。則當皆滅。如是重罪悉生極樂世界矣。何故世人依舊業識茫茫。死時如落湯螃蟹。昇墮不識所之。減罪之義何在。不應佛語有虛妄者。願爲釋答。答曰。至哉問也。彼世間未悟之人。因予所問。於此三昧必不退轉。直生淨土矣。今世人。皆謂此說是方便勸

60 1 2 3 4 5 6 7 8 9

10

80

1

2

3

4

5

6

7

8

9

進之語。豈知是佛真實之說。必不我欺也。子豈不聞汝於無量劫前。與世尊釋迦牟尼同爲凡夫之義否。而我世尊成道以來。已經爾所塵點劫數。此塵點劫妙經委明。然我亦於爾所劫中。在凡夫地漂零六道。造諸結業。不可限量。同佛至今久遠無異。如此塵劫安可稱量。假使有人於一生內。不說餘善。但稱佛名。盡壽聲聲不絕。隨其所稱之名。一一皆減八十億劫生死重罪。然盡一生以及他生。稱佛滅罪劫數雖多。若比如是極大久遠塵點之劫。正如指上土欲比大地土耳。豈可謂稱佛名能減多劫罪故。更無餘劫之業障。我生淨土耶。而不知未減之罪劫數長久。無始無際。與佛同壽實過如是八十億等數量劫外。又如炬火雖熱。欲消大地之雪。豈易融泮。故雖念佛滅罪。未得生者。其義如是。况人長劫造業心堅。念佛片時心弱。退易進難。又况與佛同爲凡夫之前。劫數轉倍乃至煩惱無始發心。在近罪豈易滅。可不思之。今謂一日至七日一心不亂。卽得往生及臨命終時一心不亂。稱佛一聲。卽減八十億劫生死重罪。乃至極惡。

東京大学総合図書館所蔵

60 1 2 3 4 5 6 7 8 9

10

80

1

2

3

4

5

6

7

8

9

逆人臨終獄火相現能稱十念悉生淨土者蓋仗我稱佛名號滅罪威神一隙之功承佛速疾救護大願之力譬如壯士正戰陣圍臨危倉卒之際得一勇夫與之強弓銳刃良馬善策即便猛發其志勇身馬上奮揚威武努力揮挽突圍而出戰勝獲功偃寇施恩歸奉其主永享豐樂此亦如是彼佛接引生極樂國其義若此故云稱佛一聲滅八十億劫生死重罪非謂如今念佛人今日三明朝四且猶且豫或見目前些兒聲色境界便被牽拽將去全無把捉與不會念

者一般欲因一稱之中真實滅多劫罪使便不爲障卽生淨土其可得乎然如此念者聲聲非不滅如是劫數罪但因初心緩故報生亦緩止可作他世生緣耳或能稱念不息雖成聚露成流之功豈得與前說較優劣速疾哉若人精進能如前說生猶反掌如箭取的決無不中故知散心念者及雖志誠未離妄想者或被如是劫外之罪所障但報在他生不能卽應其功若勵聲竭志勇猛念者旣滅爾所劫罪由勇疾力餘劫之罪不爲障礙便得十念成就往生淨土此

60 1 2 3 4 5 6 7 8 9

10

80

1

2

3

4

5

6

7

8

9

義瞭然可見。決定無疑。豈可因悠悠念佛之人。依舊業識茫茫。死時如落湯螃蟹。而疑佛爲妄語。但是勸進之說哉。故知佛力廣大。遍覆一切時處。能攝我小善入佛大願。使同一味。拔諸衆生置安樂地。使一切劫罪皆得消滅。何止減八十億劫之罪耶。如是稱佛功德實難可測。大乘圓頓橫超直截之旨。於斯可見。十疑論云。譬如十圍之索。千夫莫制。童子揮刀須臾兩分。如觀經下輩生因之說。此喻纔念滅罪卽生者也。又如佛世有人。於佛衆會欲求出家。歷徧聖衆悉。

以道眼觀察。皆謂此人永無善種。無肯度者。後至佛所。佛乃度之。比丘以是問佛。佛言。此人雖無善根。但於無量劫前。非二乘道眼所知。此人因採薪爲虎所逼。上樹避之。忽失聲稱。南無佛。以此一稱名故。於此賢劫之中。值我得度。後當會道。此明一生念佛未即獲報。於後世方得往生者也。以此例之。則知一稱佛名。雖未著何佛。尚能令人減罪得道。何况彌陀願力。超過十方。專注彼佛。稱名功德。所減罪障。不可思議耶。經云。一稱南無佛。皆已成佛道。是斯說之明證也。故

60 1 2 3 4 5 6 7 8 9

10

80

90

80

1

2

3

4

5

6

7

8

9

知若能稱彌陀名。念念不休。此功德實難稱量。雖障重人。有散心退轉者。其於往生之驗必在將來。又稱佛屬口。惟論其功。念佛在心。乃彰其德。論功則在我。不倦。彰德乃見佛現前。二義不同。優劣可見。口稱尚爾。況心念乎。是故我今因汝所問。依經述事。達諸同行。決志之人。願於此義如說修行。慎毋疑慮。

略示列祖行門第二十一

法門廣大。徧攝羣機。易進功高。衆行莫及。始自鷲峰初演大器。所歸終至震旦。流輝三乘。共證其於法化

益盛。振古絕今。可謂最上微妙不可思議極勝廣大法門者也。迨至東晉遠祖。於彼匡廬唱立其教。繼時和者一百二十三人。祖師三觀聖相。如願往生。朝士劉遺民作文立誓。亦見彼佛親自摩頂。衣覆其體。又與同志闕公則等。於命終時悉從其行。此皆傳記所明。實人世共知者也。又晉翰林張抗。但持大悲呪十萬徧。宋江陵僧曇鑒。以平日毫芒之善。悉回淨土。南齊揚都僧慧進。願誦法華爲淨土行。而此二人皆生彼國。可謂行不虛矣。抗卽見淨土在西屋間。良久而

化鑒乃覩彌陀以水灑面曰。滌汝塵垢清汝心念汝之身口俱致嚴淨。又覩瓶中生花定起與寺僧話別進因誦經致病乃願造法華百部施人填吾所誦造畢病愈忽聞空中讚善隨卽往生此三人者其功尤難具述又後魏壁谷僧曇鸞棄仙學佛修淨土真長生法臨終乃令弟子高聲念佛鸞卽向西叩頭而亡空中天樂從西而去隋僧道喻以旃檀香造三尺彌陀之像發願求生後亦死而復甦乃於冥中親覩瑞應見佛謂云明星現時吾來接引及期果逝其大行

者如唐京師善導和尚台州懷玉汾州芳果二師真州自覺睦州少康及并州惟岸等皆不離大乘建誓立願具修是行靈驗昭著感動天人法雲普覆含攝無窮法雨徧濡充擴一切其德故非一端實不可具述矣又陳隋天台智者國師洎傳法列祖法智慈雲等國初永明智覺禪師長蘆慈覺禪師此大聖師行超人天德臨三有揭昏衢之慧日破苦處之導師皆以此三昧爲自利利他傑世化人之道化儀旣畢皆生上品者也又唐長安尼淨真誦金剛經十萬偈將

終五月內十度見佛。兩度神遊極樂。唐房翥因勸一人念佛。感動幽冥。長安李知遙五會念佛。見空中神僧來接。得生淨土。上黨姚婆念佛立化。并州溫靜文妻修行如願。又張鍾馗。張善和。皆爲殺業。獄相已現。十念便歸石晉鳳翔僧智通。宋明州僧可久。觀智者遺文。一心修習。亦爾。神遊淨土。見標名華座者。出定之後。悉如其言。宋金太公黃打鐵。吳瓊初。皆爲惡業。因改悔精修。於往生時。悉有瑞應。荆王夫人。觀音縣君。馮氏夫人。雖在女流。其德反著。故知此勝法門。凡

有心者。皆可修行。奚間經白男女老幼愚智異流。極惡最逆。闡提之輩也。雖聞法音。尚生善道。人能念佛。豈不西歸。如是則但慮人之弗修。毋慮佛不垂應也。今依傳記。聊述所聞。俾同志之士。見賢思齊。爲日用行藏之警省耳。至若四海八極之地。古往今來之時。耳目不接。所聞未廣。歷時既久。亡失者多。豈能盡述。正示迴向。普勸往生。第二十二

詳夫邪見之源實。由於不正師友之教也。雖是夙業所召。豈免於自心見惑哉。惑既不離我心。報必難逃。

苦趣。況彼一染於識。萬化莫回。所以寶王三昧念佛。
 直指由是而作也。余纔立斯志。即以此心緣娑婆業。
 繫之大苦。念極樂依正之逍遙。淨穢交參。生佛互顯。
 無量義海聚之於心。法喜充盈。如不見我理事無礙。
 身土圓融。或匪筆舌所拘。蓋猶生淨土矣。如是功德。
 無量無邊。我今願以如上功德。及未來際觀集發心。
 求生淨土一切善根。如法性理。展轉無窮。自果從因。
 遍周塵刹。爲行爲願。回施衆生。一切圓成。同生淨土。
 又願承茲念力。悉使十方刹海。并娑婆世界。一切衆。

生。如我所願。若同若別。依正色心。一時趣入樂邦。教
 王無量光明一毫端中。皆爲樂國變現自在。遊戲神
 通。如佛所住。永無遺餘。我願方滿。於是重復一心攝
 我無始至今。盡未來際。若大若小。三業所修。一切無
 量善根。皆現在前。普與衆生。於極樂國一心回向。仰
 祈諸佛神力。彌陀願力。及二大士功德之力。願此法
 門。願此善根。遍我六根。及諸支體。令我六根境智自
 在。滿虛空界。皆爲色身。悉能宣說。如是法門。以此根
 身。卽於一切衆生之前。盡未來際。不生疲厭。供養恭

敬。如事世尊。五體投地。胡跪合掌。志心奉勸。勸以偈曰。

極樂世界最清淨 莊嚴微妙超世間

彌陀願力同虛空 相好光明亦如是

念念不離衆生界 普度我等生其邦

我等自甘生死中 歷劫沉淪莫超越

彼佛垂臂待已久 咎嗟禪指誠殷勤

光明欲發蓮華開 今正是時願生彼

身欲無常時欲過 衆苦交煎應當離

願速念佛同修行 盡此報身生極樂

又願此集法門。常在世間。如佛法身。作不請友利樂。一切同生安養。願天龍八部。常來護持。於此法門。不容毀滅。如法性理。永遠流通。與佛常住。

寶王三昧念佛直指下

附真妄心境圖說

60 1 2 3 4 5 6 7 8 9

10

1

2

3

4

5

6

7

8

9


真妄心境勝劣之圖

此方相喻真心大方廣

念佛可得處實取

此圖所引乃上

卷第二篇斥妄



顯真之說中來
恐人觀彼猶有
昧者。故作此圖
再述其旨。使後
學易曉云

此一大方相喻大覺不生滅之真心也。心量不可爲喻。今姑以方相擬之。此一圓相喻十方無邊虛空也。此十箇小方相喻十方各微塵數世界也。此人身中心字。喻汝今智中所蘊六塵緣影之妄心也。此妄影心在我身中。身在世界。世界在空。空在大覺本然真心之中。故知此東穢西淨二土實境兩形。遠隔十萬億國土之外。豈在汝今虛妄緣影心中。佛祖有云。惟心淨土本性彌陀者。正在此以方相爲喻能含裹十虛大覺不生滅真心中。若謂

在汝卽今妄想緣影心中。可謂惑甚。楞嚴云。譬如百千澄清大海棄之。惟認一浮沤體。目爲全潮。窮盡瀛渤。此是迷中倍人。卽此義也。又云。十方虛空生汝心內。如片雲點空。况世界在空豈能離我本然真心也。又云。空生大覺中。如海一漚發有漏微塵國。皆依空所生。如是則淨穢等土不離真心。又何礙於著相求生耶。若能了達卽近求卽無求。自合理趣。此真妄二心。古人廣有妙釋。不能具引。行者可不鑑乎。

附破妄念佛說一名直指心要

念佛三昧者。大雄氏觀此娑婆有生老病死等業繫諸苦。教人念彼阿彌陀佛求生極樂國土之法也。以彼佛身及彼國土清淨無比。莊嚴第一。依正極妙。故得名焉。彼佛衆會所有大心菩薩聞佛言教。得生彼者。尙止萬億。自是法流天下。東土西國。自始至今。如教生者轉多。不可以微塵恒沙比其數量也。去聖逾遠。人世澆漓。不知西方極樂實境。見存乃錯解諸法。在心一句。以爲玄妙。便妄認胸中六塵綠影。昏擾授

相爲心。謂樂土在內。不求生彼。顛倒甚矣。此六塵緣影。皆屬前塵。本無自體。前塵若無。此心卽滅。云何更有彼土在此心內耶。汝又謂心本在智。心小在胸。焉可著此廣大佛土耶。縱謂悟道便爲佛土在心者。只可名爲見性悟道焉。可謂之淨土在心。若人作此見者。實名邪見。縱是天魔惡賊外道種性。亦超此見世間無有此見最下劣矣。可憐憫哉。汝今若欲悟真實本然心者。先當觀汝所認六塵緣影之心。本在汝智。智住於身。身居國土。此土及一切淨穢刹海悉在虛空之內。此虛空界無際無外。十界依正。一切在中。廣大難思。此空雖大。我之天然不動真實本心。非大極大。又能圓裹如上最大虛空。彼空在我真心尚如小片之雲。忽點太清之裏。云何娑婆極樂一切淨穢刹海。而不在我本然心中耶。然則佛說諸法在心者。實非在汝智中妄想緣影心內也。乃在現前一念本真之心內也。此真實心。遠離知覺。起諸聞見。永斷一切生滅增減之相。非始非今。性本真如。具含衆妙。乃十界迷悟之本。實不可得而思議其廣大者。旣一切身

空之內。此虛空界無際無外。十界依正。一切在中。廣大難思。此空雖大。我之天然不動真實本心。非大極大。又能圓裹如上最大虛空。彼空在我真心尚如小片之雲。忽點太清之裏。云何娑婆極樂一切淨穢刹海。而不在我本然心中耶。然則佛說諸法在心者。實非在汝智中妄想緣影心內也。乃在現前一念本真之心內也。此真實心。遠離知覺。起諸聞見。永斷一切生滅增減之相。非始非今。性本真如。具含衆妙。乃十界迷悟之本。實不可得而思議其廣大者。旣一切身

土皆在汝今大覺不動真心之中。與佛同證。則知極樂娑婆等土。雖是實境。乃全我心。既全我心。我今任意於中捨東取西。厭穢忻淨。惡娑婆求極樂。乃至憎生愛佛。恣意熾然著相而求。皆不離我心也。如是而求不離心故。故彼極樂彌陀相好現時。卽自心顯。自心顯時。卽彼佛現。又我心即是彼佛之心。彼佛即是。我心之佛。一體無二。故云惟心淨土本性彌陀。非謂西方無土無佛。不須求生。但在汝生滅緣影之中。名爲惟心本性也。又云。求彼佛。卽求自心。求自心須求。

彼佛義意甚明。云何今時有等破法散僧。聞道遊儒。與泛衆禪理者。不知卽境卽心。求不礙真之理。反於不二法中。分內分外。辨境辨心。又教人捨外取內。背境向心。使憎愛轉多。分別更甚。而淡違理趣也。一分其境。便以極樂爲外。教人不必求生。一分其心。便妄指六塵緣影。虛僞妄想爲心。謂極樂在內。因思此心無質文。謂本無一切因果善惡修證之法。從是恣意妄涉世緣。教人不須禮佛。燒香然燈。誦經懺願等種種善行。謂之著相。其上者。又使彼縛心不動。如頑石。

相似壞亂禪法。甚者更令其放曠自如。言殺盜姦業悉是空華。無妨於道。因此邪見墮落生死。直向阿鼻獄底最下一層而住。罪甚屠酷。直待此見悔時。彼獄亦隨而壞。方乃得出。又於身外田屋山河大地所依之境。雖見實有。不敢說無。亦皆指爲心外之物。打作兩橛。不能得成片段。使心境一如。惟於著衣喫飯。因貪口體之重。不敢叱之爲外。而於天堂地獄及極樂土等塵刹。雖曾聞名。因不見故。直說爲無。反言某人某處快樂。便是天堂。某人某處苦楚。便是地獄。曾不

知彼真心非幻。而亦實具天堂地獄利海也。以此教人不必求生愚之甚矣。嗚呼。汝旣不識。不生滅真心。含裹太虛。妄認身內方寸緣影爲心。以賊爲子。不求於佛。其見卑哉。經云。譬如百千澄清大海。棄之。惟認一浮沤體。自爲全潮。窮盡瀛渤。如來說爲可哀憐者。正此輩也。是以我心實與佛心同一理故。故我彌陀願力。威德光明。在我心中。承我心愚癡之力。作一切佛事。無時不引導於我。我心亦於彌陀願力大心之内。修諸念佛求生一切善行。無一善行而不具舍佛。

60 1 2 3 4 5 6 7 8 9

80

9

德了彼佛德成我三昧故知彌陀願力始於發心終於究竟無一法而不直趣我心以我心卽佛心故我心亦於無始至今盡未來際修一切三昧無一法而不攝歸佛海成本來佛以佛心卽我心故如是依正色心因果淨穢雖同一心而實不妨一一自分各住其位於一心內也以一心故雖淨穢不同所求不出於真心以自分故雖一心而必捨穢取淨也捨穢取淨則感應道交見彼本性彌陀了悟一心則淨穢自分可悟惟心淨土如是而修譬如一滴投海便同一

味方知大海卽自己也豈有一行虛棄不成功德者哉今彼三家村裏愚夫愚婦雖不識理以信實有彼土故於命終時反得往生彼畏有陷空之人因認緣影爲心謂無外土故雖修道行還受生死如是則知彌陀光明威德願力常在世間化事不息尚欲攝取逃避專忘衆生况憶念佛者豈不生也又彼國土既勝其求生者亦必當深心起勝願行或單稱名號專持一咒及但旋繞禮拜乃至燒香散華六時懺悔盡撥世緣一心專注觀佛形容與白毫相心不懈廢命

60 1 2 3 4 5 6 7 8 9

1 2 3 4 5 6 7 8 9

終定生。更能孝養父母。奉事師長。慈心不殺。修十善業。受持三歸。具足衆戒。不犯威儀。淡信因果。不謗大乘。勸進行者。修如此法。亦生彼也。若得生彼。非止得生。又能了知如上著實努力念念求生之時。正是無念無求無生之理。何以故。卽精修是無修。非謂不修是無修也。若果謂一切放下。善惡無著。坦蕩無礙。爲無修者。又何異斷見外道。非愚癡而何。豈不聞古人以色相反爲無相。以淡修乃爲無修。以彼例此。法法皆爾。可不審之。今念人命無常。轉息來世。又况塵事。

連環。如鉤鎖不斷。若不能於是事。繁心塵勞。鬱結時及。正當得忘歇手不得處。一割割斷。起願立行。盡力一跳。焉得應念生彼。是故我今作禮奉勸佛子。皆當一心精進而行也。

此說因吾鄉大方李公居士作勸念佛圖。請著語於中。故述此云。時

洪武乙亥九月二十日書附

跋語

淨直向讀雲樓大師法語。便知有淨土法門。然猶謂

60

1

2

3

4

5

6

7

8

9

10

1

2

3

4

5

6

7

8

9

80

1

2

3

4

5

6

淨業與禪正如春蘭秋菊不妨各擅其美未知淨業
 即是無上微妙禪也自丁亥冬登祖堂禮萬益大師
 聞禪淨不二之談謂不惟不可不亦且無待合雖慕
 之而竊疑之今讀此念佛直指方信萬師實非謠說
 並信永明大師四科管譜真不我欺故力易衆緣刻
 印流通而衆友亦各欲奏樂助當知阿彌陀佛弘誓
 願力貫徹于人心久矣刻既成敬跋數語以識法華
 幸印中林印日淨業弟子車淨直書于四庫房



60

1

2

3

4

5

6

7

8

9

10

1

2

3

4

5

6

7

8

9

